

ایچیمده کی قیز

رقیه کبیری

حکایه لر

ایچیمده کی قیز

کبیری، رقیه

شناسنامه

فہرست

- ۱ ایچیمدہ کی قیز.....
- ۱۰ ساری قاتار.....
- ۱۶ ماوایل.....
- ۲۷ کوراوغلو دا قوجالارمیش.....
- ۳۹ آسلانین ارکک-دیشیسی اولماز.....
- ۴۷ بادمجانی رنگلی «مزدا».....
- ۵۷ سس سیزجہ آشاغا سورونن پیللہلر.....
- ۶۱ بو یئمک ککرہ دادیر.....
- ۶۵ قار یاغیر.....
- ۶۸ آدرس.....
- ۷۲ قالا.....
- ۷۶ ساری کؤینک.....
- ۸۱ منیم نہ وقتیمدی!.....

ایچیمده کی قیز

یئنه ایچیمده کی هیجانلی قیز باش قالدیریب. کولک قولاق لاریمدا کوشولدااییر. اؤنومه کی هیبتلی آدامین آرخاسیجا گئدیرم. آغ-آپ آغ قار، اؤرپک کیمی داغ-داشی بورویور.

منه دئین یوخدور بوردا نه ایشین وار! تانیمادیغین کیشی ایله بیرلیکده داغ-داشا گلیسن!.. ایچیمده کی قیز سسله نیر: «پیس دوشونمه؛ یولداش لاریمیزین هامیسی گونمه لیدی».

ایچیمده کی دوز دئییر. بو آدامی یاخشی تانیماسام دا، بیلیمیرم نه دن دیر اونا گونیرم. هئچ ده قورخمورام. اوندان اوشونمورم. راحت. نه دن ناراحت اولوم کی؟! نه اولسا بیزی یوخاریدان بیر-بیریمیزه تانیتمدیریبلار.

داغان یوخاری قالخاندا، یولون قیراغیندا کی دامچانی منه گؤستردی: «اورا، بهلول عمی نین ائویدی». منیم گؤزوم قاش-قاباقلی بولودلاردایدی. «ئله بیل

یاغاجاق» - دئدیم. بولودلارا باخیب اوزومه گولدو. «ایکی ساعت چکمز، تئز قایداریق» - دئدی.

بیر آندا سرت سیماسی پوزولدو. شیرین-شیرین گولوشو ایچیمدهکی قیزین اوره بین تاپیلداتدی.

بیلمه دیم نجه یوخاری قالخدیق. باشیم سؤز-صحبتہ قاریشمیشدی؛ صحبتہ یوخ، اثشیمه یه. ائله دانیشیردی، سانکی بیر حزبین باشقانی ایدی. من آنجاق قولاق آسیردیم. هر دن استرسلی مکتب اوشاق لاری کیمی سؤال لارین جوابلایاندا، ایچیمدهکی قیز آز قالیردی اوندان سوروشسون «آخی بو سؤزلرین ائولنمه یه نه دخلی وار؟»

هر نه اولسا مندن یوخاری رتبه ده ایدی. سوروشسایدیم منه گولردی. اؤز یانیندا دوشونوردی، بلکه بیر شی آنلامیرام. یقین دخلی واردیر کی، منی معلّم کیمی سورغو-سؤالا چکیردی. یوخسا اللی دفعه دئمزدی «ئولنمه یه گؤره فکریمیزی بللی ائتمه لیک!» بلکه ده دوز دئیردی؛ یاخشی بیر ائولیلیک سورمه یه، مارکسیسم-کاپیتالیسیمی داها یاخشی بیلمه لیدیک!

ایچیمدهکی کوسه ین قیز بو سؤزلره داریخیردی. قاش-قاباغین ساللامیشدی. من اونون سؤزلرینه دقتله قولاق آسدیقا، اوتانماز-اوتانماز گؤزونو اونون گؤزونہ زیلله بیردی. او ایسه گؤزلرین آیاغینا تیکیب، دورمادان دانیشیردی.

بیر ساعتدن آرتیق دیر اونون آرخاسیجا آشاغی ائتیرم. یوخاری چیخاندا منیمله آباقی بیر چیخدی. هر بیر سؤزه مارکس دان بیر اؤرنک گتیردی.

نچه دفعه ایچیمدهکی دیل اوتو یئمیش قیز، آغزین دولدوردو سوروشسون کی، «مارکسین ائولیلییه گؤره دوشونجه سی نه دیر؟» - قویمادیم. «دینمه» - دئدیم.

دئیر بس کی، سیاسی سوادیم شئهلەنیب. ائوه گندنده کتابلاری وراقلایب اوخویارام.

یورولموشام. قار دنه جیکلری هوژمونن اوز-گۆزومه چیرپیلیر، گۆزلویومه آغ اؤرتوک چکیر. گۆزلویو گۆتورورم. اونو، بیر قارالتی کیمی گۆرورم. آددیم لاریمی یواشلادیرام. تیتیره ییرم. یقین اوشویورم. یوووخ! اوشومورم. تردن ایسلانان پالتارلاریم، جانیم سواشیر.

اؤنومه کی هیبتلی آدامیم گئری دؤنوب، منه باخیر: «یورولدون مو؟» دینمیرم. دیل اوتو یتمیش قیز، آغزینی آچیب گۆزونو یومور: «دئیرسن بس منیم ده سنه تای بو هیبتده آیی گوجوم وار؟» من دوداق لاریمی دیشله ییرم. او ایسه «آز قالیر بهلول عمی نین دامچاسینا یئتیشک» - دئیر. ال لرینی جیبینه قویوب، یئنه اوزومه گولور. بیغلاریندا بوز سیرسیرا باغلایب.

قار دنه لری هؤله سک اؤزلرینی داغ-داشا چیرپیرلار. چرقدیم ایسلانیب. قارا کاپشیمین رنگی دیشیلیب، آغ رنگه چالیر. یئره دوشن قاری، تورپاق اممیر. قوش باشی قارین اوست-اوسته قالانماسی چوخ خوشوما گلیر.

یئنه ده تیتیره ییرم. بلکه ده قورخورام. نه دن قورخمالیام؟ او کی، بورالاری یاخشی تانیییر. اؤزو ده گوجلو، قوللو-قوتلی دیر. دقتله اونا باخیرام. ایچیمده کی قیز دئیر:

«ائله بیل قابان دی، باشینی سالیب قاباقدان گئدیر».

«کس سسینی» - دئیرم. بو نه سؤزدو؟ الله قویسا اونونلا ائولنه جه یمها!!

ایچیمده کی دل سوو قیز دینج دورا بیلیمیر. قیملدانیر. دئیر: «بو هوندور هیبتلی هیكله، آیی دان باشقا نه دئمک اولار؟»

اونو حاقلايیرام، «اما مهربان آی!» - دئییرم. «بیر آز دا چؤل شوفرلرینه اوخشاییر».

ایلک گؤروشده اونو اوزاقدان گؤردوکده، دوستوم پرییه دئدیم «شوفردی؟» بیغلاری بورما دئییلدی؛ استالینین بیغلاری کیمی ایدی. بویلو-بوخونلو، کورهکلی، آمریکایی اوورکت ایچینده ائله شستلی گؤرونوردو کی، «چؤل شوفری» دئدییمه اوتانیدیم.

پری، «جواد یولداشیمیزی» - دئدی. الینی منه ساری اوزالیدی گولومسهدی: «جوجه جواد! منه جوجه جواد دئییرلر».

گوله-گوله اونون آیی قامتینه باخدیم. ایچیمدهکی دیل اوتو یئمیش قیز دئدی: «اگر جوجه آیی یتکه لیکده اولسا، گؤر خوروز نه اولار!»

جوجه جواد، ائله بیل ایچیمدهکی نین سسینی ائشیتدی. داماغینداکی سیگاری بارماق لاریندا توتوب، قاپی نین باشینداکی تابلونو گؤستردی.

ساپ-ساری، مخمر قانادلی جوجه شکلی نین اوستونده یازیلیمیشدی «جوجه کشی لاری». هله اوندا آنلادیم کی، نییه بو هیکللی آداما جوجه جواد دئییرلر.

کولک شدتله نیب. داغ آشاغی ائترکن هر آددیم باشی ایچیمدهکی قیزین هیجانلی آرتیر. «بیر آز ایرهلی یئری، الیندن توت» - دئییر. «یورولموشام، آیاغیم سویروشور» - دئی. ایچیمدهکی نین سؤزونه قولاق وئرمیرم. یواش-یواش اونون آرخاسیجا گئدیرم. آیاق لاریمی قار اوستوندهکی آیاق ایزلرینه قویورام. نهدن بو آداما اینانیب «تک آلتی» یا گلدییمی بیلیمیرم. ایچیمدهکی قیز جیغاز آتیلیب-دوشور: «نئجه کی بیلیمیرم؟ دئنه ازیلیب-بوزولمک ایستردین دا... نه یامان دا ازیلدین... لاپ ائله شیرین سالدین ها! اؤزونوووو...»

ایچیمده کینه «دینمه، اؤز ایشینه باخ» - دئییرم.

یقین منی آرتیق تانیماق اوچون بورالارا گتیریب. دئمیش لر: بیر آدمی یاخشی تانیماق اوچون، اونولا یول یولداسی اولمالیسان. یوخسا مارکسین فلسفه سی، مانیفستی نی، اوندا گره ک باغلی قاپی لارین دالی سیندا، سیگار لارین توستو-دومانین دا دانی شاسان. گل داغین دؤشونده، بو گؤزل لیکده رمانتیک یئرده، فلسفه دن دانی ش؛ نه اولسون کی! بیلیرم منی سیناییر. یوخسا بیلیمیر کی، هر ایشین، هر سؤزون بیر یئری وار؟!

ایچیمده کی شیلتاقلیق اندیر. منی راحت بوراخمیر. قار دنه جیک لری داغ-داشا چیریلان کیمی، اؤزونو دوشونجه مین اورتاسینا چیرپیر. «آیاغین بودره سه، تپه سی اوسته دره نین دیبینه دوشه جکسن» - دئییر. «یاخشی وقت دی، گنت الیندن توت!»

دئییرم: «من کی یالوارمایاجام، اؤزو گره ک بیل سین دا!». ایچیمده کی دجل قیز «دایان! گتتمه» - دئییر. آیاق لاریم تپه نین یئنی شینده میخلانیب قالیر. داغ جیغیریندا، آغ-قارا هیكله اوخشاییرام. او ایسه ال لری جیب لری نده آستا-آستا آشاغی ائیر. دجل قیز ایچیمدن سس له نیر: «جواد یولداس!.. یولداس...» دؤنوب منه باخیر. باخیشی، چوخ مهربان دیر. «یورولدون مو؟» دینمیرم. قار آدمی کیمی دونوق گؤزلریمی اونا تیکیرم. «یاریم ساعته بهلول عمی نین دامچاسینداییق» - دئییب یولا دوشور.

من هله دایانمیشام. بیر ده دؤنوب گوله-گوله «بهلول عمی نین چایینی ایچسن یورقونلوعون چیخار» - دئییر.

ایچیمده کی دجل قیزا آجیقلا نیرام. «ئشیتدین می نه دئییر؟! او دا سنین جوابین! ایندی سسینی کس، اونون آرخاسینجا گئت». ایچیمده کی، دوداق لارین بوزور. آز قالیر آغلا سین. من ده سس سیزجه اونون آرخاسیجا گئدیرم.

هردن بیر دایانیب منه باخیر. اوزومه گولومسه ییر. قار ایله اؤرتولوب آغاران بیغلاری، قیروو توتמוש اوتلارا اوخشاییر. اونا باخماق یامان خوشوما گلیر. گویرمیش دوداق لاری، قارلی بیغلاری نین آلتیندا یقین بوز باغلا ییب. گئت-گئده او دوداق لارلا اؤپولمک هوسی منده گوجلنه نیر. دوداق لاریم یانیر. بیر اوووج قار گؤتورورم. اؤزومدن اوتانیرام. بهلول عمی نین چایینی تئزلیکله ایچسه دیدیم...

ایچیمده کی کوسگون قیز دینمیر، دانیشمیر؛ فکره دالمیش. جوجه جوادین ایسلانمیش اوورکتونا باخیر. دئییرم «چوخ شستلی، بویلو-بوخونلودو». ایچیمده کی، سس سیزجه اونون بوی-بوخونونا باخیر. منیم جانیم گیزیلده ییر. «قوجاگی چوخ ایستی دی» - دئییرم. ایچیمده کی منه آیری-آیری باخیر. اؤزوم ده بئله دوشوندویومدن اوتانیرام.

اوزاقدان هافیلتی سسی گلیر. ایتلر هوروشورلر. یئنه اؤزومو قیناییرام «عقلین قاچمیشدی! تک باشینا، قیشین چیلله سینده، کولکده، «تک آلتی» یا گله سن؟! ایچیمده کی کوسگون قیز دئییر: «دئمهدین قورددان، جیک-جانا واردان گلیب آدمی تیکه-پارچا ائدر؟!»

دئینده «تک آلتی» داغینا گئده ک، خوشلاندیم. بیلسه یدم بو قدر سوسیالیزمدن، کاپیتالیزمدن دانیشاجاق گلمزیدیم.

هیبت لی آدمیم سایماز جاسینا، قول لارین توولایا-توولایا، دوشوب قاباغیمدا گئدیر. اونون ایستی قوجاگی نین فکری منی اوشودور. ایچیمده کی ایله

هیمله شیب، ال-بیر اولورام: «گل! بیر ایش گۆرک کی، هئج اولماسا الیمدن یاپیشسین دا!!!»

قار دنه جیکلری داغین هر طرفین چولقالاییب. ساغیم-سولوم، اؤنوم-آرخام، هر طرفه باخیرام آغ آپ آغ دیر. بیز، داغ جیغیریندا یئرین ایکی قار آدامی بیق. دنه جیکلر، قار آدام لاری نین اوست-باشینا اله نیر. ایچیمده کی کوسگون قیزا دئییرم «باشلییق؟!» ایچیمده کی نین اوره یی ائله تاپیلدا بیر کی، من ده ائشیدیرم. هیجاندا نه ائده جه یینی بیلیمیر. تله سیر. اولور بئله ایش لردن اؤترو. آیاق لاریم بیر آن دایانیر. «بیر آدیم بئله آتمییا جاقسان!» - دئییرم. اونو چاغیریرام «یولداش جواد! جوجه جواد! یولداش!..» دؤنوب منه باخیر. ایچیمده کی دئییر: «کاش قول لارینی آچسین، گلیب دئسین...»

قول لارین آچمیر، ساچ لاریندا، بیغ لارین دا اوتوران قاری چیریر. «دایاندم، سنی گۆزله بیرم، گل!» - دئییر.

ایچیمده کی شیلتا قیز دوداق لارینی بوزور. «بو دا کی اخلاق یوکودو» - دئییر. اونا یاخین لاشاندا، یولا دوشوب گئدیر. ایچیمده کی ببردن دوشونجه مین اورتاسینا آتیلیر «پس سنین آیاغین سوروشمز؟»

هئج بیلیمیر نه اولور. ببردن بیخیلیرام. یئرده، اوزاناقلی وضعیتده اونا ساری سوروشورم. ایچیمده کی «کاش اونا توخوناسان» - دئییر. اوندان بیر آز قاباقدا بیر داشا توخونوب دایانیرام. جانیم اینجییر. یئرده اوزاناقلی قالیرام. قایغیجیل، مهربان آبی کیمی، ایلیلیر؛ اوزومه باخیب دئییر: «نه اولدو؟ آیاغین سوروشدو؟» باشیمی ترپه دیرم «قالخا بیلرسن؟» «هه» دئمک ایسته دییمده، ایچیمده کی اورتایا آتیلیر. قول لاریمی توتوب، اونا ساری اوزالدر. او ایسه، بیر الی ایله کوره ییمدن، او بیر الی ایله ده الیمدن توتوب منی یئردن قالدیریر. ایستی

نفسی اوزومه دیر. دونموش یاناق لاریم قیزیشیر. پالتارلاریمین قارینی چیرپیرام. ایچیمده کی، آز قالیر آغلا سین.

آخشامین آلتورانین دا، یئتمیش یاشلی، هیبتلی، اوجا بویلو، باشی پاپاقلی، یاراشققلی، کورکو چیینین ده بیر کیشی دامچانین قاباغیندا دوروب. الینده کی فنری یوخاری قالدیریب. بیزه باخیر. آغارمیش تئل لری پاپاق آلتیندان آلتینا تۆکولوب. ایچیمده کی دیله گلیر: «بو دا کی استالینین دوغماسی دی!»

گوله-گوله سلام وئریب، خوش گۆردوک - دئییر. آغزیندان چیخان نفسی، سانکی بم موسیقی نین نوتلاری دیر؛ زدونموش هاوادا یوخاری اوچور: «خانیم قیزیمیز خوش گلیب. خوش گۆردوک سنی، آی اوغول!»

ایچیمده کی قولاغیما پیچیلدا ییر: «نه گۆزل سسی وار!» ایچری گیرنده، دامچانین ایستیسی، اودون سوباسی نین قوخوسو، ساکن لشدیرجی درمان کیمی وجودومو دینجلدیر.

بهلول عمی، بوز رنگلی لهستان چارپایی سینی سوبانین دیبینه قویوب منه باخیر: «ایندی جانین قیزیشار». سونرا یکی استکان-نعلبکی گتیریب، سوبانین یانیندا کی آغ بویالی دمیر میزین اوسته قویور. بیر آن ایچیمده کی تعجب له یئریندن قالخیر. بهلول عمی، چاپنیکین لولویونو آغزینا دایاییب، اوفورور: «بونون دا لولویو توتولوب» - دئییر. جوجه جواد منه گۆز وورور «دنیا دا سنین چای لارین کیمی دادلی بیر چای تاپیلماز، بهلول عمی!» گۆزوم استکان لارا سوزولن چایدا قالیب.

بهلول عمی، کورکونو چیین لری نه چکیب منه باخیر. «خانیم قیزین قایناناسی دئییه سن بیله سین چوخ ایسته ییر. سیز گلمزدن بیر نئچه ساعت قاباق پیتی قویوموشام. دوروم، بیر آزا سو یون آرتیریم».

قاپی نین یانینداکی آفتافانی گۆتوروب، پیله تهنین اوستونده کی گوودوشون دوواغین گۆتورور. اتین ایسی بورنوما دولور. آجیمدان اؤلورم.

بهلول عمی، آفتافدان پیتی یه بیر آزا سو تۆکوب دوواغی قویور. ایچیمده کی قیزین آغزی آجیلا قالیب. جوجه جواد، بارماغین دوداغینا قویوب گوله-گوله سوس دئییر.

گۆزومو بهلول عمی دن آیرا بیلیمیرم. آفتافا الینده قاپیا ساری گئدیر: «سیز چای ایچینجن، من سو باشینا چیخیم، گلیم» - دئییر. هبیتلی هیکلی قاپی نین آرخاسیندا ایتیر. سوبانین ایستی سی قاردان ایسلانان شلواریمی قیزدیریر. ایچیمده کی هبجانلی دجل قیز، باخیش لارینی جواد یولداشین گۆزلرینه تیکیر. من اوتانیرام. یاناق لاریم قیزاریب، پؤرتوب.

سوباداکی اودون لارین چیرتاچیرت سسینی دینله ییرم. بیر آن جوجه آیی نین گوجلوقول لاری لهستانی چارپایی نین آرخاسیندان بوینوما دولاشیر. جانیم گیزیلده ییر...

ساری قاتار

نئچه ساعت اولاردی ترپنمه دن یاتاغیندا اوزانمیشدی. گۆزو دیوارداکی تقویمه ساتاشدیقدا، یئریندن قالخیب اوتوردو. یاتاغین قیراغینداکی میز اوستوندن، درمان لارین ایچیندن بیر کپسول گۆتوردو. درمان لارین یانینداکی بوش لیوانا باخدی. کپسولو میز اوسته بوراخیب آیاغا دوردو.

ساللانا-ساللانا آتاسی نین اوتاغینا گئدیب، قولاغینی قاپییا یاتیردی. آتاسی نین خورولتوسو چوخ عجیب ایدی؛ گولمه یی گلیردی. یینی آغزینا توتوب اوتاغینا قاییتدی. قیرمیزی چرقدینی باشینا سالدی. قارا تئل لری، قیرمیزی چرقدین آلتیندان اوزون کیرپیک لری نین اوستونه تۆکولموشدو. آغ مانتوسونو گئییب، سونرا آییلیب اته یینه باخدی. «داها لکه سی یوخدو» - دئییه میز یلداندی. قاپینی یواشجا کیپله دی. تیققیلیتی سسی گلدی. قولاغینی قاپییا دایادی. ایچریدن هئچ

بیر سس گلمیردی. آپارتمانین پیلله لرینی تله سیک ائنیب ساعتینه باخدی. عقر به لر آلتی نین یاریسینی گۆستریردی. «وقتینده چاتارام» - دئییه دوشوندو. خیابان ازدحامیندا قایناشان آدم لارا باخدی. دیل آلتی «آریق، اوجا بوی، دوروملو، یاراشیقلی، الینده سامسونیت، گونش گۆزلو کلو» - دئدی. گۆز آلتی هر یئری سوزدو. ساغ-سولا، اؤنونه، آرخاسینا باخدی؛ آنجاق آختاردیغینی گۆرمه دی.

کۆرپونون آلتیندا سیرالانمیش تاکسی لری گۆرنده، اوشاقلیغینداکی اویونجاق قاتاری یادینا دوشدو. ساری رنگلی قاتاری نین ریل لری، پلاستیک دن ایدی. گولومسه دی. ریلین تیکه لری بیر-بیرینه قوراشدیریلاندان سونرا، اوزرینده قاتار حرکت اندردی. هئچ وقت یولوندان چیخمازدی. قاتار فیرلاندیقجا، اونون باشی فیرلاناردی. ایندی ایسه تاکسی لره دقت ائله دیکجه، اونلار دا سوروجولریله بیرگه باشیندا فیرلانیرلار.

گۆزلویونون فوتوکروم شوشه سینا چرقدی نین اوجویلا سیلیدی. یانیندان سوووشان اوجا بوی بیر اوغلانا گۆزو ساتاشدی. گۆزلویونو تله سیک گۆزونه ووروب، قاراباقارا اوغلانین ایزینه دوشدو. اوغلانا چاتیب، اونولا چیبین-چیبینه یئرییه رک، گۆز اوجو و دقتله اونو سوزدو. «یوخ، او دئییل!» - دئییب دایاندی. اوغلان تعجب له دؤنوب اونا باخدی.

خیابانین او بیرری الینده قزئت کۆشکونو گۆردو. کۆشکه ساری گئتدی. هر دن قزئت لره باخیر، هر دن ده کافی شاپی گودوردو. قزئتچی گوله-گوله، یانینداکی کیشی یه گۆز ووروب «ایندی باشلاناجاق» - دئدی. ایکسی ده گولوشدولر.

کۆشکون قاباغیندا، بؤیوک چارپایی اوستونده یان-یانا دوزولن قزئت لر، درگی لر واریددی. درگی لرین جلدلرینده، بزدیلمیش گۆزل-گۆیچک قیز اوشاق لاری، بعضاً

ده قادين آكتيورلارين شكيللری گۇرونوردو. هنر آشپزی» آدلی درگی نین اوزرینده یئمکلرین آدینی و شکلینی گۇردو کده آغزی سولاندى. عطش ایدی. بیر آز دا آجیخمیشدی. بیر ده دۇنوب کافی شاپا باخدی. گزدییی آدم، اونسوز اورایا گئتمزدی. بیر داها درگی لره باخاندا، آکتیورلارلا اوشاقلارین شکیللری گۇزونه توتقون گۇروندو.

قرئت باشلیقلاریندا سانکی قاریشقلار قیمیلائیردی. گۇزلوینو بورنون اوستونه ائندیردی. بیر قرئتلی الینه آلدیقا، سانکی قاریشقلار میخلانیب بیر یئرده قالدیلار. قرئتلی یئرینه قویدو. بیر ده گۇزآلتی قیمیلائیان قاریشقلارلا باخدی. قرئتچی اۇزونو اونون سورغو-سؤالینا جواب وئرمه به حاضیرلامیشدیرسا دا، او، بیر سۇز سوروشمادان اوزاقلاشدی. قرئتچی تعجبله دوداقلارینی بوزوب یانینداکی کیشییه باخاراق چییینلرینی چکدی.

چرقدی نین دوینونو آچیب یئنی دن برک-برک دوینوله یندن سونرا، کافی شاپا ساری دۇندو. آلنینی رفلکس شوشه یه دایادی. ایچری بیر آز قارانلیق گۇرونوردو. خیابان قیراغیندا سیرایلا دوزولن بوش تاکسیلار باخدی. یئنه ده گزدییی آدم اوردا دئییلدی. موبایلینی چیخاریب، بیر نمره ییغدی. دیت دیت سسی بیئینه دوشدو. «بلکه گلیب ایچریده اوتورب» - دئییه میزیداندى.

کافی شاپین اوماتیک قاپیسی نین قاباغیندا دایاندىقا، قاپی اۇز-اۇزونه آچیلدی. چرقدی نین دوینونو بیر ده برکیدیب، ایچری گیردی. ماوی نئونلا ایشیقلامیش میزین آرخاسیندا، ساری رنگلی اوتوراجاقتا اوتوردو. ساری قاتاری هله ده باشیندا فیرلانیردی.

موبایلینی بیر داها کیفیندن چیخاریب، نمره‌لری بیغدی. یئنه دیت‌دیت‌دیت سسی ائشیتدی. مئساژ یازماغا باشلادی «من بوردايام، ایلک گؤروش یئریمیزده. اوتورموشام، سنی گؤزله‌ییرم!»

موبایللی میزین اوستونه قويدو. کافی‌شاپین میزلی الوان نئون‌لارا ایشقلانمیشدی. گنج قیز-اوغلان‌لار اوز-اوزه اوتورموشدولار. الوان نئون‌لارا باخدیقا گؤزلی قاماشدی. سالنون بیر بوجاغیندا، سکی اوزرینده بلور بارداق‌لار، نئون‌لارین ایشیغینی عکس ائتدیردیلر. یان سکی‌ده، ساریشین بیر قادین سفارش‌لری آلیب، حساباتا یئتیشیردی.

سکی آرخاسیندا دوران قارسون‌لارین بیر، یانینداکی گؤزلوکلو دوستونو دوسموسکله‌ییب، قاشییلا ماوی نئونلو میزه اشاره ائدیپ گولدو.

او ایسه گؤزویله قارسون‌لاری آختاریردی. ساریشین قادین «اونا دولاشمایین! هئچ کسه آزاری کنچمز... بیر قهوه ایچیب گنده‌جک» - دئدی. گؤزلوکلو قارسون کؤنول‌سوزجه اونون میزی‌نین باشینا گندیپ گولومسه‌دی.

او، چانتاسیندان پول چیخاردیب، قارسونا وئردی «بیر لیوان پرتقال سویو...» قارسون تعجب‌له اونا باخدی. او ایسه دیکسیندی. قارسونون گؤزلی یوخ ایدی. گؤزلی‌نین یئرینه ایکی چوخور واریددی. قارسوندان اوز دؤندریب، الینده‌کی پولو کیفینه آتدی. دؤنوب بیر ده قارسونا باخدی. قارسون «قهوه ایله شکلات گتیریم؟» - دئییه سوروشدو.

گؤزونو ماوی ایشیغا تیکیب «پرتقال سویو لطفاً» - دئدی.

قارسون سکی‌یه ساری گنده-گنده، دؤنوب بیر ده اونا باخدی. او، یئنه ده چرقدی‌نین اوجویلا گؤزلویونو سیلدی. قارسونون دوستو قهوه ایله شکلاتی سکی‌نین اوستونه قویموشودو. قارسون قاشینی آتاراق «پرتقال سویو ایسته‌دی بو

گون» - دئدی. صانديق باشیندا اوتوران ساریشین قادین دوداق لارینی بوزوب باشینی توولادی.

نچه دفعه قیرمیز قمیش له پرتقال سویونو قاریشدیریب بیر آز ایچدی. آغزی تورشادی. قمیشی الینه گؤتوروب دقتله باخدی. پرتقال سویو اته یینه دامدی. «یئنه لکه لندی! آما بو دفعه قیرمیزی دئییل!» - دئییه اؤزونو ائووندوردو. قاپی دان ایچری گیرن لره باخدی. اوجا بویلو، آریق بیر اوغلان گؤردو. آنجاق سامسونیت یئرینه چینینده آسما کیف وار ایدی؛ اوسته لیک تک ده دئییلدی.

قمیشین بوروق لارینا باخدی. دانشگاهدا کئچیرتدی بیی آنا تومی درس لری یادینا دوشدو. بوروق لار هر ایکی طرفدن بوشلوقا قوووشوردو. باغیرساق لار هانکی عضولره بیتیشیک دیر دئییه فکرلشدی. آنجاق هارایا بیتیشیرسه بیتیشین، قمیش له باغیرساغین تام فرقلی، بعضاً ده بیر-بیریله ترس اولدوغو وضعیت لرینی دوشوندو: «قمیش بیر هورتولتو ایله یوخاری چکیر، باغیرساق بیر خاریلتی ایله آشاغی بوراخیر!»

سس سیزجه گولدو. قمیشی بارداغین ایچینه قایتاراندان، قمیش بارداغین اوزرینده قالدی. قمیشه باخدیقدا نه دنسه چیممه یی دوشوندو. بیر دفعه چیمیرکن، سودا نجه ال-آیاق چالماغینی یادیندان چیخارمیشدی. همن گون آز قالمیشدی چیمرلیکده بوغولسون. چوخ گوج له، صنعی نفس له، اوره ک ماساژیلا نفسینی قایتارمیشدی لار. بیر آز قورخومشودو. آتاسی هئچ وقت اونا گؤله گئتمه یه، چیمرلیکده گزمه یه بئله اجازه وئرمیردی.

تره جه گلن اوجا بویلو اوغلان لا قیز، اونون بؤیرونده کی یاشیل نئون لو میزده اوتورموشدولار. قیز، ماتیکلی دوداق لارییلا دورمادان گولومسه ییردی. اوغلان ایسه دانیشا-دانیشا، اونون دوداق لارینا دونوخوب قالمیشدی. او ایسه گؤزونو

اوغانين كىفينه تىكمىشىدى: «او كىفین يئرینه سامسونیت اولسايدى، بىر ده يانينداكى قىز اونونلا اولماسايدى، يقين بىلردىم كى اؤزودور...»
ساعتينه باخدى. گۇروش وقتىندن بىر چوخ زمان اؤتموشدو. قمىشى بارماق لارىيلا دىك توتوب پرتقال سويونو بىر نىفسه ايچرى اؤتوردو. بۇيرونده كى ميزده اوتوران قىزلا اوغلان، اونون هورتولتو سىسینه دؤنوب پىققىلدايدىلار. ائله بىلدى قارنىندان قورئلتو سسى گلير. ايكى اللى قارنىنى اؤوكه لى. ياشيل نئون لو ميزين اړخاسيندا، يالنىز ايكى كؤلگه گۇردو. تعجب له يان-يؤره سىنده كى ميزلره گۇز دولاندىردى. نئون لارين ايشيغىندا قوشا اوتوران قىز-اوغلان لار، كؤلگه ايدىلر سانكى.

يئنه ده گۇز لويونو چىخاردى. بو دؤنه آغ مانتوسونون آته يى ايله سيلدى. موبايلىنى قوردالادى. كىفنده كى تقويمى چىخارىب واراقلادى. تعجب دن آغزى آچىلا قالدى. «آه... نىجه كىرىخمىشام!» - اوجا سسله سؤيله دى.

ياشيل نئونلو ميزده كى لر اونا سارى دؤندو؛ او ايسه گوله-گوله موبايلىندا بىر مئساژ يازدى: «تقويمده گون لرى سهو سالمىشام. بو گون آيين اون اوچودور، اون دۇردو دئىيل كى. تقصير گۇزلويومده دير. اون دۇردونده گۇروشريك!»

ياشا دولموش بىر كىشى قاپى دان ايچرى گىرىب قىزا سارى گلدى. «قىزىم! يئنه بورا گلىبسن كى! گلسه ائويزه گلجك! بورا گلمز.»

قىزىن قولوندا توتوب اوتوراجاقدان قالدردى. اوتانا-اوتانا ساندىق باشينداكى سارىشىن قادينباخىب، باشىنى تىپتدى.

ماوايل

شنبه

هفته نين ايلك گونودور. يئدى گوندور قاپيني اوزومه قاپاتميشام. بلكه ده بئلهسى هاميميزا ياخشى دير. اونلارين دؤره سينه دولانميرام. قوى منى گؤرمه دن، مندن اوزاق، بارى بير آز تميز نفس چكسين لر.

پنجره دن باخيرام. ايكينجى قاتاكي دؤشسوز قونشوموز، الينده ايكي بربرى آپارتمانا سارى گلير. اوغوم كتاب قولتوغوندا باخيشيمين دايره سيندن اوزاقلاشير. اوچونجو قاتين پنجره سيندن باخاندا اونون بويو، اولدوغوندان دا بير آز قيسا گؤرونور. اريم، ماشيني ايشله دير. موتورون عكس صداسى پنجره نين لكه لى، توزلو شوشه سينه توخونوب گئرى قاييدير. ماشين يوللانديقا قولاق لاريم دينجه لير.

شوشەنن لکەلری ائەبیل ال لریمە باخیر. ایل بایرامینا آز قالیر. من سە کئفسیز، داماق سیزام. سانکی آت باسیب، داشقاسی اوستومدن کئچیب. ایش گۆرمک هوسی ایچیمدە اولوب؛ یاشاماق کیمی، گولمک کیمی...

اریم، اوغلوم، قیزیم، اوچو دە بیرگە گولندە، ائەبیلدیم تنەبی نین دیوارلاری اوستومە گلدی؛ قاچیب اوتاغا گیرمەسە دیدیم، دیوارلارین آراسیندا از یلردیم. ایییرمی گوندن سونرا ائو دۇنموشدوم. اوغلوم گولە-گولە دئدی: «هر نەیین همراھین گۆرموشدوک، ماوالدان سونرا». اریم اؤسگوردو. او ایسە اۆزونە آلمادان پیققیلدایب بیر دە دئدی: «دوغرودان گۆر نە یاخین لیق لاری وارا! موبایل؛ ماوال!»

من دە اوزونە گولدوم. گولوشومدە بیلمەدیم نەایدی پارتلادی. آغزیم زققتوۋ دادی وئردی. گۆزلریمدن ائەبیل بولاق شیرلادی.

اریم گۆزونو آغارتدی. قیزیم، اوغلومون قولونو چیمدیکلەیب «جەنم اول» - دئدی. اوغلوم دورتمە ایلە قیزیمین بۇیروندن ووروب «نە دئییرم کی؟ ظارافات ائلیرم دا!!!. هله شکیل چکیب، فیس بوکا دا قویاجام».

بۇیرومدە کی کیسەدن سس چیخدی. اوچو دە بیردن گولوشدولر. اۆزومون خبیریم اولمادان یئل بوراخمیشدیم. قاچیب یاتاق اوتاغینا گیردیم. قاپینی قیفیللادیم.

پنجرەنی آچیرام. بایرام آیی نین آغ یئلی پنجرەننن تول اؤرتیونو^۱ هاوادا اوینادیر. یاتاغمین آغ ملفەلریندە گزیشیر. بیلیرم! یئل، نە قدر چاغلاییب چیرپینسا دا، ائودە بوران جمەدک قوخوسونو و تاقدان آپاراسی دئییل.

اۆز ایچیمدە، اۆزلویومە داریخیرام. داریخدیقدا بارماق لاریم یازماغا جان آتیر. بیر آیدان آرتیق دیر بیر کلمە اولسون بئله یازمامیشام. سانکی دوشونجەمین قاپیسی

^۱ تور پردە. پردە ی توری نازک.

ھۇرولوب. توزلو شوشەننن اوزرينده يازى يازماغا ھوسلەنننرم. بارماغيم شوشەنننن اوستونده اوينايير. شوشەننننن توزوندا يازى نين ايزى قالير: «ماوايل».

بازار

مريض خاناي گتدييم هفته نين ايکينجى گونويدو. گئندنه سئوينيرديم كى، قانسيزليقدان، خشکيتدن، عذابدان قورتاراجاغام. دئيرديم بس سود گؤلونه دوشهجهيم. دوشدومدا... اوزو ده... اوسته... اوسته دا يانا بيلمهديم، ساغ بۇيروم اوسته دوشدوم.

جراح حکيم دئدى: «سيمنتدن ديوار اولسايدى، بورغو^۱ ايله بير ايش گورمك اولاردى؛ اما سنين باغيرساغى نين يولو ائله دولوب-تيخانميشدى كى، دولايى يول آچديق!»

ايندسه دولايى يول بۇيرومدن باش آچيب. جمداق قوخوسو هر يانيمى بورويوب. پالتارلاريمى، اوست-باشيمى، جانيمى؛ ساچلاريمدان بئله جمداق قوخوسو گلير. گونده نئچه دفعه پنجره نى آچيرام. عطر-ادکلن دا قانيق وئرمير. گئجه لر ياتا بيلميرم. ساغ بۇيروم اوسته دوشسم، دئيرم بس بۇيرومدن قوپوب جالاناچاق. قورخومدان ياتاغيما پلاستىك سالميشام. مريض خانادان دۇنن گون، پلاستىكىن خيشيلتى سيندان نه اوزوم ياتا بيلديم نه اريم. بيلمهديم خيشيلتى دان ايدى يوخسا پيس قوخودان، اريم گئجه ياريسى سس سيز-سميرسيز يورقان-ياسديغين گۇتوروب تنه بيه گئندى. او گئدن قارداشدى كى، گئديب.

^۱ باجا دلمک اوچون آلت. دريل.

دئديم «اوتاغيما گلمه!» آنجاق ايکي آياغين بير باشماغا دورتدو کي دورتدو. «قول-بويون اولاجاغيق بو گئجه» - دئدى. نئجه ده قول-بويون اولدوق! هميشه کي کيمي دينمز-سؤيله مز سويوقدان بوزا دؤنموش آياق لاريمي قيزديردي. قيزيشما آياق لاريمان بوتون جاننما ياييلدي. الي اويلوغومدا^۱ دولاشاندا، جاننم گيزيلده دي. نئجه ده اوره ييمي ايسيتميشدي. اوجاق کيمي ايستي ال لري.. باغرينا باسيب اوزومدن اؤپنده، شر^۲ داغارجيني بو شيشميش کيسه ايکيميزين آراميزدا قالدي. ديسکينيب بيردن گئري چکيلدي. آغزين آچدي بير سؤز دئسين؛ دينمه دي. اونا، وحشي جه سينه ساريلماغي م گلدي. آنجاق داليمي چئويرديم. حرصمدن دوداق لاريمي گميرديم.

يننه پلاستيکين خيشيلتيسي بئنينمه دوشدو. بئليم، کوره ک لريم قيزيشدي. الي يواشجا گئجه لييمين ياخاسيندان سينه مين آلتيندا کي کيسه يه دبنده، اينی غيض ايله ائله چکدي کي، ياخاما توخوندو. سانکي ايبيره نچ بير جاناوارا توخونموشدو.

يننه گؤز لريمدن بولاق جوشدو. بير داها پلاستيکين خيشيلتيسي گلديکده، ياسديق-يورقان لينده، جين کيمي اوتاقدان ائشيبه چيخدي. ايکينجي قاتدا کي دؤش سوز قونشوموز يادما دوشدو. ال لريمي سينه مده داراقلاديم. گؤزومون ياشي ديواردا کي کوبلن تابلوي باخا-باخا قورودو. پنجره دن سيزان ايشيغين آلتيندا، منه ائله گلير کي، قيزيل تاباق لارين^۳ آياق لاري سويون ايجينده دئييل، لؤمه باتاقلقدادي سانکي. بو تابلونو، ايل لر اؤنجه ايلمه-ايلمه اؤز اليم له آرغاميشديم^۴.

^۱ آياغين ديزدن يوخاري حصه سي. بود.

^۲ بير نوع بؤبوک سو قوشو. فلامينگو قوشو.

^۳ توخوماق. تیکمک.

بازار ائرتەسى

سحر يئمەيى اوتاغين بير بوجاغيندا مژمئىي دەدير؛ آنجاق من اونا ال دە وورماميشام. يئمك دن قورخورام. بوغازيمدان هوپدورماميش بۇيرومدن چيخير. ائوھ دۇندويوم گون قيزيم دسترخانى گتيريب اوتاغيمدا آچدى. «سن گلمەسن بيز گلرېك» - دئدى. ايكي قاشيق يئمەميش بۇيرومدن كيسەنين ايچينە دوشوب پاققىلدادى.

اولوم اوزونو ساخلايا بيلمەيىب پيققىلدادى. آغزىندا كىنى اودماميش «والله لاپ ائله وقتى دى. ايندى شكيل چكىب فيس بوكدا يئرلشديرسم بيرىنجى چىخار!» باشىنى آشاغى تيكن ارىمين آغزى ترپە نيردى. قاشيغى - خرکن ماشين لارىنا تورپاق يوكلەين مكنىكى قازما ايدى سانكى؛ آغزىنا دولو آپارىب بوش قايتاريردى. قيزيم - دسترخان باشىندان دوروب الى آغزىندا بايىرا قاچدى. يئرئىمدن قالخىرام. سكوت ائوى بورويوب. هر كس اؤز دوھسەين گزر دئميش لر؛ هامى اؤز ايشىنە مشغول دور. پنجرەدن بايىرا باخىرام. دۇشسوز قونشوموز بير قوجاق گۆي - گۆيرتى، ترەوزى^۱ گتيرير. قوجاغى، ديرر كدير^۲ سانكى.

آپارتمانين قارشىسىنداكى پاركدا، بايرام يئلى قارلاى ارىديب. پنجرەدن باخاندا سارالميش چىمن آغ - ياشيل رنگە چالير. بو گون - صاباح آغاج لارين جوجردىيىنى گۆرەجەيم. بيردن - بيرە بۇيرومدن گۆيەرن باغىرساق كىمى. دۇشسوز قونشوموزون تام ترسىنە. منىم بۇيرومدن گۆيەرن باغىرساق، اونون كسيك دۇش لرى نين يارا ايزلرى هئچ دە عقلىمدن چىخىمير.

^۱ بستان بيتىگى لرى، بامادور، بامجان، خبار و س...

^۲ ترەوزى لرىن اكيلىدىي يئر.

آسفالت اوزرىندە آرېمىش قار ايزى، پىنتى قادىن لارىن شورا قويموش مانتوسونو يادىما سالىر.

ئۈدە كېمىسە اولماياند، سرگردان روح كېمى ھەر يئرى گزېرېم. ارېمىن يورقان- ياسدىغى تەنبىدە دىوار دىبىندە بوكولو قالىب. اوغلومون تومانى موبلون اوستوندىدېر.

قايدان ايلىب اوشاق لارىن اوتاغىنا باخىرام. اوتاغىن اورتاسىنا داغىلان كىتاب لار، قىرىلمىش قوشوندىر سانكى اوتاقتا يئردە قالىب.

اوغلومون تومانىن موبلون اوستوندىن گۆتوروب، اوشاق لارىن اوتاغىنا سارى گىدېرېم. يارى بولدىن قايدېرېم. گرەك اونلارېن پار-پالتار لارىنا ال وورمايېم؛ يوخسا اونلار چىمچە شرلر.

آشپىز خانامدا ھەر شىيىن يئرى دىيشىك دوشوب. قابلامالار، قاشىق-چىنگال لارىن باش لارى آشاغى، سانكى مىندن كوسموشلر. اوجاغىن قىراغىنداكى ياغ قابى تىكان كولودور سانكى، گۆزۈمە باتىر.

سماورى يوخلايېرام. ھلە جانى اىستىدېر. مۇمەببىدە چاى لكەلرى وار. استىكان لارىن دىبىندە چاى تىلىفى قورويوب قالىب. دۆزە بىلمىرېم بوراسى منىم آشپىز خانام. ھەر شىيى يئرى-يئرىندە اولمالى. بونو قىزىما دئمەلېيىم. ھلە اۆلمەمىش كى، نىيە قاب-قاجاغىن يئرى دىيشىك دوشوب!..

چىرىشئە آخشامى

نە آرخاما باخا بىلېرېم، نە اۆنومو آيدىن گۆرۈرېم. آرادا قالمىشام. دئىرلر «يئتىمە وای-وای دئىن چوخ اولار، چۆرەك وئرن آز». مريض خانادان گلدېيىم گون،

تلفنوموز سوسموردو؛ زنگ، زنگ اوسته گليردى؛ اريمين تزه سيگارى، سۇنن
سيگارين كۇتويو ايله آليشديرديغي كيمي!

بو گون، نه قدر پنجره قاباغيندا دوردوم، دۇش سوز قونشودان خبر اولمادى كى
اولمادى. تلفنوم دا سوسوب. ايكي گوندور كى، اريم ده ايش يئرinden زنگ
آچيب، احواليمي سوروشمور. آتيلميش، اونودولموش لار كيمي يم.

گوزگو قاباغيندا يام. آرخادا كتابخانامدا سيرا يلا دوزولن كتاب لار وار. گنديب
كتاب لارين بيريني آچيرام. «ونلار اولمكله مشغول دورلار» كتابين جيلدينده
يازيليپ. «آن سكستونون» اولومله ايلگيلى شعر كتاييدى. دارىخيرام. كتابى
اوخوماميش يئرينه قايتاريرام. نه اتندي ييمي بيلميرم. ايتي ييم ايتيب سانكى!..

يئنه گوزگو قاباغيندا دورورام. ساچ لاريم كيلكله نيب، پير-پيرتلاشيق دير.
گۇزلريم چوخورا باتيب. دوداق لاريم بوزاريپ. گوزگونون قاباغيندا سيرا يلا
دوزولموش رۇلارين قاباغيني بيربه بير آچيب باخيرام. گۇز مدادى، بزك كيفيمين
يارى آچيق زيبي ائشيكده قاليپ. اليمي اوزومه چكيرم. قاقيرداق^۱ كيمي دير.
كرمى اووجوما سيخيب اوزومه ياخيرام؛ بيرآز سيغاللا ييرام. اليمي يومشانميش
ياناغىما چكيرم. چهرايى رۇ دوداق لاريمدا گزيشير. داراق، ساچ لاريمين
كيلكله سيني آچير. گوزگوده قادين اوشاييرام؛ بيرآز دا سورمه له نيم دئيه، قارا
مدادى گۇزومه چكركن باغير ساغيم غفيل دن كيسه نين ايچينه بوشالير. بير آنليق
اولسا بئله بو سوؤخا^۲ كيسه نى اونوتموشدوم. مدادى گوزگويه چير پيرام. مداد
گوزگوده، ايينه بويدا قارا ايز بوراخير. دوداق لاريمدا كى رۇ اليمله سيليرم. رۇ،

^۱ جيزليق.

^۲ آندير. ميراث.

چنەمە يايىلىر. ساچ لاريمى اليم لە پير تالاش ديري رام. گوز گودن، سيرك تلخه يينه بنزه ين بير قادين منه باخير...

چرشنبه

اولو-اودونلو گون لريم اؤتوب. اوجاقدا قالان كؤزلردن بير قور بئله چير تلامير. قولوم سوستا ليب. ياتا غيمدان قالخماغا اينجاريم يو خدور. هر آي باشى اولدوغوم كيمي، جانيم قيز دير مالي، دؤشوم داش كيمي دير. توخوملوق لاريمين آكتيو زمانى دير. بو قيز دير ما، جنسى هورمون لاريمين يوكسلمه سيندن دير، يقين بيليرم. دؤش سوز قونشوموزون دوشونجه سى منى راحت بورا خمير. اونون هورمون لارى نين يوكسلمه زمانيندا دؤش لر يندن قالان يارا ايز لر ينى دوشونورم. گؤره سن او، آي باشى اولار كن نه حالا دوشور؟ دؤش لرى گيز يلدە يير مى؟! دريسى بوزوشور مو؟ بلكه ده يارا لارى نين يئرى گؤينه يير...

آلتيمداكى پلاستيكي خيشيلتيسى يالقيز ليغيمى اوزومه چكىر سانكى. گؤزوم، تاوانين گچ ايشلەمە لر ينده قاليب. ديوار ين چهر ايبى بو ياسيندا، گل ين لر ين دوم آغ چلنگينه اوخشا يير بو قابار تمالار.

تنه بيدن گلن تلويزون سسى، آرى ويز يلىتى سيدير سانكى، قولاغيمدا سسلە نير. بلكه ده اريم، ماجرالى و چوخ هيجانلى بير فيلم ايزله يير. آراميزدا بير قايى ليق مسافه وار. بؤيرومده كى كولوستومى كيسه سايه سينده قايى، سانكى هابيل ديوارى دير، من ده بير فلسطينلى قادينام.

اگر پلاستيكي خيشيلتيسى، بير ده بؤيرومده كى كيسه اولماسايدى، ديوار ين آرخاسيندا تك باشيما قيز دير ما ايچينده يانماز ديم.

قاپى نين كلىدىنى بورورام. اوست-اوسته گئىدىيىم پالتارلارى سويونورام. چىرىل-چىلپاق گوزگولەنيرم. كئشكە دۇش سوز قادىن ھىچ بىر زمان گوزگو قاباغىندا اۇز چىلپاق گۆدەسىنە باخماسىن دئىيرم. بۇيرومدەكى كيسه، ھەلەلىك بوم-بوش دور. يواشجا يورقانيمىن آلتىنا سوزولورم. يورقانين سىرنىلىيى، جانيمىن قىزدىر ماسىنى آلير. گۆزلريمى يومورام.

جوما آخشامى

قولومو يورقانين آلتىندان چىخاريرام. اوشويورم. يورقانى قاوزايندا، سويوق جانىما ايشلەيير. ھەلە ايندى يادىما دوشور گنجە چىرىل-چىلپاق يورقانين آلتىنا سويروشوموشدوم، بىر شئى بۇيرومدە آغىرلىق ائدير سانكى. كيسەم يادىما دوشور. دوروب دىيشمەلىيم. گوزگونون قاباغىندان كئچىندە قارنىمىن چىزگى لرینه سارى ساللانان كولوستومى كيسەبە باخيرام. ندىنە نەم يادىما دوشور. ھاراداسا بىر پىنتى اوشاق گۆرسەيدى «پوخ موتالى دىر»^۱ - دئىردى. دوغرودان دا ائلە بۇيرومدەكى كيسه ايلە پوخ موتالىنا دۇنموشم. بىر آن گوزگو قاباغىندا، چىركىن گۆدەلى ھىكل كىمى قورويوب قاليرام. واءى! كيسەننن ايچىندەكى لر نەدى؟ بونلار ھاردان چىخدى؟.. يوخسا قارنىم قوردلانىب؟ گۆر نە كيسەننننننننننننننننن قىمىلدايىرلار!

ال لريم اسير. نە ائىلەييم؟ كىمە دئىيم؟.. اريمە زنگ آچىم؟ اوندا ھىچ ائوھ دولانماز! يوخسا قىزىما؟ يووو... ائلە اولورسا، تلفن دالىسىندا كئچىنر. بلكە اوغلوم! او، ھارادا اولسا اۆزونو يئتيرر فىس بوک صفحەسىنە سورپرېز بىر شكىل اوچون! قاچىم جراح حكيمىن يانىنا...

^۱ پندير و ياغ ساخلاماق اوچون درى دن حاضرلانان تولوق.

قورخورام كېسەيە باخېم. اورەيېم بولانېر. آخى بېردن-بېرە منە نە اولدو؟ بو نارنجى لار نەدى؟ شاما سوپ ايچمېشىدىم. اولمايا يىركۆكۈ؟! يوخسا قوردان بىزەين لار دە سوپون ارىشتەسى... آااخ! قورد اولسايدى اولردىمھا. بېرچە ائلە قورد قويماغېم قالمېشىدى. نە ياخشى ائودە ھىچ كېم يوخدور. يوخسا بو ھالى گۇرن اوغلوم-قىزىم غۇمور بويو بېر قاشىق دا بئلە سوپ ايچمزدېلر.

اۋزومدن چىمچەشىرم، سويا جومورام. بو گون چىلەين دن تۇكولن سو، فرقلى دېر دئەسەن. ھەر گون دوش الدېغېم سودان دېشىك دېر. سو، ائلە مېرەبان-مېرەبان آخېر، ائلەبېل نازلانا-نازلانا بدنېمدە اوېنايېر. دامجى لارى مېنجىق-مېنجىق بدنېمدن اطرافا سېچرايېر. سرامېكىن اوستوندى سو يولونا آخېر.

جانېمى لېفلەيېرم. صابون لو الېم بدنېمدە سوېرۇشور. بارماغېمى باغېرساغېمېن باشېنا وورورام. اوووووف... آجېشىر. صابون لو الېمى باغېرساغېمدان يوخارى چكېرم. دۇش سوز قونشوموز عقلىمدن چىخېمېر...

قتفەنى جانېما بورويورم. گونشېن اېشىغى اوتاغېمېن اورتاسېنا، ياتاغېمېن اوستونە دوشوب. تول اۋرتويون دالېسېندان باخېرام. دۇش سوز قونشو قوجاغېنداكى دېبچكە، آغ-آپ آغ تون چىچەيى^۱ آپارتمانا سارى گلېر...

جوما گونو

ھفتەنېن سون گونودور. ھەر يىر باغلى، ھەر شىئى تەعطىل. كىشىگە ھىياتېن دا تەعطىلى اولاردى. آلتى گون ياشايېب، يىتدېنجى گون اۋلۇب، سونرادان دېرېلرېدىك. آلتى گونودور اۋلو كېمىيېم. بو جىمدك قوخولو كېسەلى ھىياتېمدا، يالنىز يازى لارېم لاشامېشام.

^۱ گىجەلر عطر ساچان گول. گل شېب بو.

يثرىمدن قالخىرام. گوزگودە اۆزومە باخىرام. قاپىنى يواشجا آچىرام. ارىم، تنەبىدە يىتتىم اوشاقلار كىمى بالىنجىنى قوجاقلایىب خورولدايىر. اوشاقلارىن اوتاغىندان ايچرى گىرمىرم. قاپىدان باخىرام. يوخودا ائله معصوم گۆرونورلر كى، اونلارى اۋپمەيىم گلير. حماما گىرمىك اىستەيىرم. يثرىيندە كىسەم لاقهالاق لاققىلدايىر. اوغوم دوز دئىير، بلکہ دە كىسەمدن چكديىي شكيلیي فيسبوکا قويسا، بىرىنجى چىخدى...

حمامدان چىخمىشام. پنجرەدن آپارتمانين اۋنوندەكى پاركا باخىرام. گئجە ياغان ياغىشدان آسفالت دا دىنج، توختاق گۆرونور. ساچلارىمىن سويو چيىينلریمە دامجى لايىر. دۇشسوز قادين، اليندە ايكي كوكە آپارتمانا سارى گلير. پنجرەنى آچىرام. توزلو شوشەدە بارماغىلم لا يازديغيم «ماوايل» كلمەسى ھلە دە دورور. الیمی شوشەيە چكىرم.

دۇشسوز قادين گۆزومدن ايتەنە قدر، اونو ايزلەيىرم. بو گئجەدن اوتاغيم تون چىچەيى نين عطرى ايلە دولاجاق دئيه دوشونورم...

كوراوغلو دا قوجالارميش

قاراپوسەك^۱ آستا-آستا چيلەيىردى. چوخ كىچمەدن چيلەمە ياغيش اوتاغىمىن پنجرەسىنە دۇيور. توزلو جاملاردا ياغيش گيلەلرى نىن ايزى قالير. من جيغىردا دايانمىشام. بولودلارن گۆز ياشلارى داملا-داملا ساچلاريمى، ياناغىمى ايسلادير. سانكى منى يوخودان اويادير. آياغىمى بۇيوك بير داشين اوستونە قويورام. آياغىم ياغىشدان ايسلانمىش مامير^۲ ناخيشلى داش اوستونە سويروشور، بودرەيىرم. سازين سرلى-سئحيرلى سسىنە دلى اولموشام. چوخداندير كى ياخيندان ساز دىنلەمەمىشم. گرەك ياخيندان اوتوروب دىنلەيىم اونو.

^۱ چن و دومانان سونرا ياغان نارين ياغيش.

^۲ داشلارن اوزەرىندە گۆبرن كۆكسوز و يارپاق سىز ايتدايى بيتكى. عادتاً سارى، ياشيل رنگلى اولور.

بیر وقتلر اژدر عمی نین سازینا واله ایدیدیم. او دوروشوقلو، یاراشیقلی، شستلی قدی-قامتی ایله سازی ائله چالاردی کی، دئیردین بس کوراوغلو ایندیجه قاپیدان گیریپ دئیجهک «چونکی اولدون دییرمانچی / چاغیر گلسین دن کوراوغلو!» حیف اولسون کی، اژدر عمی قوجالیپ. بئلی بوکولوب، دیش لری تۆکولوب، سازی ایسه...

ایندیسه کوراوغلو سازی نین شاقراق سسی، سیسلی هاوادا قایالاری بورویوب. من سه اونو یایخیندان دینله مه یه دری-دن-قابیقدا چیخیر، ال-آیقادان گندیرم. آنجاق یوخاری قالخماغا نه قدر جان آتیرام، بیر او قدر ده اذیت چکیرم. جیغیردا دایانیپ قالمیشام. بیر یانیم قورخولو سیلدیریم، او بیری یانیم ایسه بولودلاری باغرینا قوجان یالچین قایالار. یوخاری قالخیم دئییه اوشاق لار کیمی ایمکله ییرم. داهار^۱ یئرین چینقیل لاری، خیر داش لاری دیزلریمه، ال لریمین آ یاسینا^۲ توخونوبان اینجیدیر منی. اوغرون-اوغرون آدیملاییرام. بیر آز یوخاری قالخیرام. آ یاغیمین بودرهمه سیندن قورخورام. ائله اولورسا، تپه م اوسته یارقانا دوشه جه یم. اؤز-اؤزومه توختالیق وئریر، ایره لی آدیملاییرام. نه قدر چالیشیرام یوخاری قالخا بیلیمیرم.

چاره سیز قالیب بیر داشین اوستونده اوتورورام. هر دن قول لاریمی داراقلاییر، هر دنسه قولتوق لاریمی قوجاقلاییرام. کوراوغلو سازی نین یئلتمه^۳ هاواسی ییلا، دان یئرینه یول آلیرام.

^۱ داشلی، چینقیلی داغ یئری.

^۲ الین ایچی.

^۳ قدیم اوغوزلاردا اویون هاوالاریندان بیرینین آدی. اساساً گلین اوینارکن چالینیر.

کور اوغلو طۇيله دامیندا هوپوخوموش، فکره دالمیش، نەسە بیر شئی ماددیم-
ماددیم سوزور. «نییه تله سەدین؟!» - دئییرم. «روشن! بیر آرجا دۇزوملو
اولسایدین، قیرآت قاناد آچمیشدی...»

آلی کیشی دئییر: «بلکه قسمت بئله یمیش!» کور اوغلو اؤزونو لعنت لەیرک «نییه
قسمتی دئییشە بیلەمەدیم!» - دئییر.

من سە دوشونورم؛ کور اوغلو قسمتی دیشمیش اولسایدی، اوندا دور آیغیر بلکه
دە قیرآتین قانادلارینی قیسقناردی.

گورشاد^۱ شیدیرغی شیغاییر. آت قویروغو^۲، آت قولاغی^۳ دامالار کور اوغلونون
سازیندان قوپان جینگیلی لرله بیرگە پنجرەمە چیرپیلیر. باشیمی کتابدان
قالدیریب باییرا باخیرام. یاغیش گیلەلری سو بومباسی دیر سانکی، جام لارین
اوزریندە پارتلایب آشاغی سوزولور. ساچ لاریم ایسلانیب. ایسلاق گئجەلییم
جانیم سواشیر. کورەیم اوشویور. یثریمدن قالخیب شالیمی چیبین لریمە
سالیرام.

کتابی قوجا قلا ییرام. قایلارین باشیندان گلن ساز سسی دامار لایمدا آخان ایستی
قان دیر سانکی. کور اوغلونون آوازی نیگار خانیمی استانبولدان قاچیرماق
ماجراسینی قایلاردا سسلندیریر.

کور اوغلو قیرآت بئلیندە، نیگار ایسە ترکیندە، من دە نیگاردان اجازە سیز،
قول لاریمی اونون بئلینە دولامیشام. بارماق لاریم آز قالیر کور اوغلو یا چاتسین.
قیرآت دۇردنالا چاپیر. نیگارین شوه ساچ لاری هاوادا یئلەنیر. کولک لە داغالانان
ساچ لار، اوز-گۆزومە ساریلیر. گۆزلریم قارالیر.

^۱ کولک سیز هاوادا یاغان گوجلو یاغیش .

^۲ ایری دنه لی یاغیش.

^۳ بیر بویدا و بیر بیچیم دە اولان ایکی شئی.

قارانلیق آستا-آستا پنجره دن اوتاغیمین اورتاسینا اوزانیر. قالخیب میز اوستو چیراغیمی یاندریرام.

هله آخشاما چوخ قالیر. گلیرم... گلیرم... گلیرم؛ قایالارین دیبینده، داش اوستونده اوتوردوغوم یترده اوتورورام.

بیرسی یاغیشین آغزینا پیچاق آتمیش دئییه سن، یاغیش کسب. بلن لری^۱، یاماج لاری بوروین چن بولودلارا قاریشیب. گونش بولودلاری ایشیقلا ندیرمیش. سازین دا سسی کسلیب. باشیمی یوخاری قالدیریب گوموشو دونقار^۲ قایالارا باخیرام.

قیریشلی آلی، ائشمه بیغ لاری، ایچینی اوزونده عکس ائتدیریر. آنجاق آردیج^۳ قامتی آزجا ایلمیش؛ کوراوغلونون گوزو اوزاقلاردا، آستا-آستا داغدان ائتیر. قوشا بولاقدان گلیر. آتاسی مزاریندن.

منه چاتان کیمی داش اوستونده اوتورور. اونا یاخین لاشیرام. «یورولمایاسان کوراوغلو!» - دئییرم. نیگار خانیم یوخدور. الیمی الی نین اوستونه قویورام. ال لری پوللانمیش^۴ دمیر کیمی دیر. اطرافیمی سوزه رک بارماق لاریمی آغارمیش ساچ لاریندا گزدیریرم. بارماق لاریمین اوجو کوز کیمی دیر. باشیمی دیزلرینه قویورام. ایستی اویلوق لاری^۵ یاناق لاریمی ایسیندیریر. ال لریندن توتوب ساچ لاریمدا گزدیرمک ایسته ییرم. او ایسه سازینی دؤشوندن آلیب بیر قیراغا قویور. قیلینجی نین اوجو یترده کی داش لارا دئییر. «کوراوغلو! منه بیر یانلق کرمی

^۱ سوسوز یئرلرده و بیتگی سیز داغ لارین اته یینده اولان کیچیک یاشیل لیق دئمکدیر.

^۲ قوز. داغین عمومی استقامتدن کنارا چیخان حصه سی.

^۳ سرو آغاجی.

^۴ اوددا قیزاردیلمیش.

^۵ آیاغین دیزدن یوخاری حصه سی.

چال! - دئيريم، ائشيتيمير. گۆزلىرىنى يومور. بارماغىمى سازى نىن تئل لرىنه چكىرم.

جىنقىدى... جىنقىدى... جىنقىدى...

كوراوغلو گۆزلىرىن آچير. منه باخير. آنجاق منى گۆرمور. باشىنى قالديرىپ بولودلارا چكىلميش هوندور قايلارا باخير. من ده گۆزلىرىمى بولودلارا زىلله ييرم. باشىم دۇنور. بىر پارچا كۆز كىمى يم. باشىمى اونون ديزىندن گۆتورورم.

كوراوغلو سازى دۇشونه آلىب يولونا دوام ائدير. هر آددىم آتدىقدا ساز، تۇولما بئشىك^۱ كىمى دۇشونده ييرقالانىر. بئلىنه قورشانميش مصرى قىلىنچى، سانكى اونولا قوشا آددىم لايبير. اونون آرخاسىنجا چنلى بئله گئديرم. اوزاقدان نىگار خانىمى گۆرورم. كوراوغلو دا اونو گۆرور. «كئشگه من او داش اوستونده اوتورارديم» - دئيريم.

نىگار، تك-تنها اوتوروب آغ قايلارا باخير. ساچلارى چيىن لرىندن بئلىنه شلاله لنىب. هۇله سك بىر شكىلده، كوراوغلودان قاباق نىگارا ياناشيرام. آما كوراوغلو ياخين لاشدىقجا، نىگارين قاشلارى چاتىلىر، گۆزلىرى توتقون بولودلار كىمى دولور، بىر هيمه بئددير، دىندىرن اولورسا نئيسان ياغىشى تك ياغاسى دىر.

كوراوغلو نىگارين يانىندا اوتورور. من سه او بىرى يانىندا اوتورورام. كوراوغلونون قولو نىگارين بئلىنه دولاشيركن منيم ده قولوما توخونور. قازان دولوسو قاينار سو، باشىمدان آشاغى تۇكولور سانكى.

^۱ تاوان يا دا باشقا بىر يىردن آسىلى وضعيتده اولان بئشىك.

گۆزلىمى يومورام. كىتابى، مىز اوستونه بوراخىرام. چىراق، كور اوغلوپلا نىگارين اوتوردوغو داشين اوستونو ايشىق لاندىرير. نىگارين باشى كور اوغلونون دۇشونده كى سازا سۇيكەنىب. ساچلارى ايسه اونون دىزلىرینه تۇكولوب.

هندهورىمه گۆز گزديريرم. كىتابخانامدا سىرايلا دوزولن كىتابلار ائله بىل بوز قالىبلارى دىر؛ كىتابلارين سوپوغو اىچىمى ارىدیر. اوشويورم، اوشونورم، دوشونورم. كىتابى باغرىما باسىرام. نىگار خانىمىن سسى گلیر:

«قوچ ايبىدیم! كىچن گون لر يادىما دوشور. چنلى بئله آت كىشترتى سىندن، دلى لرین نعره سىندن، قىلىنچلارین سىنىدن قولاق توتولاردى. اورايا بئله، قوش قوشلوعوندا قانادلانمازدى. سن نعره چكديكده داغلار، داشلار سسىنه سس وئردى. ايندى هانى او گون لر؟! ايندى چنلى بئله قوو ووروسان قولاق توتولور».

كور اوغلو قاراقاباق سىماسىيلا دىنمز-سۇيلمز قىيا تۇكوبن^۱ اوزاقلارا باخیر. بارماقلارى نىگارين ساچلارىندا گزىشىر. اليمى ساچلارىما چكىرم. كور اوغلوپلا ياخين لاشىرام؛ اليمى ساچلارىنا آپاردىقدا، نىگار، قارا خومار گۆزلىرىلە، سىيىرمه باخىشىيلا منە باخیر. گۆزلىرى منە گئت دئير سانكى. اوتانىرام. بوينو بوكولو، ائىر-قالخار چنلى بئلىن بان ائولرىنه^۲، بىنه^۳ لرىنه سارى گئدیرم. بويلانىب بىرەبىر اىچرى لرىنه باخىرام. تاوانلارین ويغالىنى^۴ قوروم^۵ باسمىش. تندىرلر سۇئوك، ارسىن لر ايسه تندىرلرین پىيه سىنه^۶ بوراخىلمىش. تاخىل كندى لرى^۷ اوزوقويلو

^۱ كسىگىن و حدتلى باخماق.

^۲ تاغلى گونبىزلى ائو. يوورالاق قوببالى چادر.

^۳ موقتى مسكن.

^۴ بنانىن سقىفنده ايشلەنن دىرك.

^۵ دوواردا و دىركده اولان توستو و نمىشلىيىن ايزى.

^۶ تندىرین قىراغى.

^۷ اىچىنده دن، يا دا اون ساخلاىلان كوپ.

یثره سرلیب. اوجاق لاردا یاریمچیق یانمیش اودون لار کول توپاسینا قویلانیب. تونلوکدن^۱ تۆکولن یاغیش ایزلری کولون اوستونده خال-خال گۆرونور. چالی-چیرپی، گون، تیکان کول لاری بوش ائولرین بوجاغیندا تلله نیب. کلولار^۲ دا بوشدور کاغالار^۳ دا. غفیلدن آیاغیم چارداغین قاباغیندا دۆشه مه یه^۴ ایلیشیر. اودون قالاغیندان توتماسایدیم، ییخیلاجاقدیم. دۆنדרمه نین آلتیندا چیغ بسد^۵ ایچره سامانا قویلانمیش بیر نئچه یومورتا وار. نه بیلیم، بلکه بو یومورتالار کوت تویوغون فالاسی دیر.

ائولرین بیرسی دۆشه نکلی دیر. بیر بوجاقدا چیچک ناخیشلی اویماصان دیق^۶، او بیرسینده ایسه یورقان-دۆشک باغلیسی. باغلی اوزرینده ایسه ایکی یاستیق گۆرونور. کوراوغلونون میخدان آسیلان، قاراگول^۷ بۆرکو، یارغاق^۸ کورکو، قارساق^۹ دری سیندن تیکلمیش چکمه نی^{۱۰} اؤزونه چکیر منی. دیواردا، کورکون یانیندا سینق بیر گوزگو وار. ایچری گیریرم. الیمی کورکه چکیرم. سینق گوزگوده اؤزومه باخیرام. سیر-صفتیم پارچا-پارچا گۆرونور. گوزوم صاندیقدا قالیب. یاخین لاشیب قیفیلینی یوخلاییرام. الیم هاوادا قوروپور. گئری چکلییرم. نیگار خانیمین صاندیغیندا نه وار دئییه دوشونورم. ائشیییه چیخمدان کوراوغلونون

^۱ اوتاغین یا دا چادیرین تاوانیندا توستونون چیخماسی اوچون تعبیه اولونموش باجا. پنجره.

^۲ مال-حیوانین ساخلاندیغی یئر.

^۳ چپیش ایله قوزولارین ساخلاندیغی یئر.

^۴ چینقیل دۆشنمیش پیدایا یولو. سنگ فرش.

^۵ قامیش و یاخود نازک شوی لردن حاضر لاندیمیش بسد.

^۶ اوزره ینده قازما ناخیش اولان صاندیق.

^۷ بیر جنس قویون. سقط اولونموش قوزوسونون دری سیندن قیمتلی بۆرک حاضر لاندیر.

^۸ اووولموش قوزو دریسی.

^۹ قیمتلی دریسی اولان تولکو نوعو.

^{۱۰} اوستلوک. یاغیشدا گنییلن اوزون یاپینجی.

کورکونو میخدان آلیرام. قوخولاییب باغریما باسیرام. ائشییه چیخارکن آیاق ایزلریم دؤشمه‌نین اوستونده قالیر. بیر آندا اؤزومه گلیرم. کوراوغلویلا نیگار مندن چوخ اوزاقلاشیب‌لار. اونلارین آرخاسینجا قاچیرام. آیاغیم نه‌سه بیر زادا ایلیشیر. اوزو اوسته یئره بیخیلرام، ال‌لریم اینجییر. قاچماسام اونلارا یئتیشه بیلرم. قاچا-قاچا گؤزوم یاشیل مخمرلی دره‌لرده قالیب. داش‌لارین دیبینه‌کی ساری گول‌لرده، یاماج‌لاردا بیتن دوه تیکان‌لاری، قوتاز گول‌لری هله ده کۆرپه‌دیرلر. کئچه-کئچه الیمی گول‌لره چکیرم. ال‌لریمین یارالی آیاسی آجیشیر. آز قالیرام کوراوغلویلا نیگارا چاتیم. کک‌اوتو اییسی گلیر. کک‌اوتو کول‌لاریندان، توهلوجه‌لردن یان کئچه بیلیمیرم. داشین دیبندن بیر اوووج کک‌اوتو دریب بورنوما توتورام. گؤزل قوخو بورنومو اوخشاییر. یاغیش دیمیش کک‌اوتونون قوخوسو قانیمی جوشدورور. اوره‌ییمدن قارا-قارا قان‌لار کئچیر. کک‌اوتو چایینا یامان یئریکله‌میشم. تله‌سیک ایکی تئل قوپاریب آغزیما آتیرام، عطری دیلیمی گۆینه‌دیر. بیر اوووج دا نیگارخانیمما آپاریم دئییه دوشونورم. سونرا اوووجمداکی اوتو یئره سپه‌له‌یرم.

کوراوغلو یاشلی بیر کیشی ایله دانیشیر. کیشی، چیبینه تئنگ یولون اورتاسینی آلیب دورموش. چوماغینی چنه‌سینه دا‌یامیش، کوراوغلویلا نیگارا باخیر. یولون قیراغیندا ایکی اؤکوز اوتلاییر.

کوراوغلونون بئلینه حمایل اولان قیلینجی، نیگارین اته‌ینه دیر. نگارین اته‌یینه‌کی ناخیش چیچک‌لری داش‌لارین دیبینه‌کی ساری چیچک‌لره اوخشاییر.

نیگار خانیمین یانیندا دایانیرام. ایندییه کیمی بو قدر اونا یاخین لاشمامیشدیم. چیینیمی اونون چیینینه سؤیکه ییرم. بویداشیق^۱. اورتا یاشلی اولسا بله، بسته بویو ایلمه ییب هله. منیم بوی-بوخونوم نیگاردان شله لی دیر. دقتله باخیرام؛ شوه ساچ لارینا دن دوشوب. منیم ده ساچ لاریمین چینگه سینده^۲ بیر نچه آغ توک وار. چکه سینه^۳ چکیلن چاتما قاش لاری قورولو یای دیر ائله بیل. کیپرک لری قیوریلیب قاش لارینا دایانیب. منیم کیمی قارتال بورون دور. آنجاق نیگار مندن داها اؤتگم لی^۴، تیتیکلی^۵ گؤرونور. دوداق لاریندا گولویشه^۶ بیر تبسم وار. گولوشونو دوشوندوکده، ژوکوند تابلوسونداکی مونالیزانین آجی گولوشو یادیم دوشور. کور او غلو تفنگ چی کیشی ایله دانیشیر:

«چیینینده کی نه دیر؟» - دئییر. سونرا دؤنوب نیگارا باخیر. یئنه سؤزونه دوام ائدیر «یاری آغاج، یاری دمیردی» - دئییر. کیشی آغزینی آچمامیش اورتا یا آتیلیرام. «تفنگ دی» - دئییرم «کور او غلو!».

او سسیمی ائشیتیمیر. کیشی «تفنگ دی» - دئییر. کور او غلو قاش لارینی چاتیر. قیریشلانمیش آلنیندا نچه چیزگی گؤرونور:

«تفنگ نه دی؟» - دئییر.

^۱ بیر بویدا اولان. هم قد.

^۲ تئل. ساچین قیوریم لاری.

^۳ آلنن هر ایکی طرفی. شقیقه.

^۴ مغرور. نفوذلو.

^۵ چیویک. گوجلو.

^۶ تورشا شیرین. میخوش. فارسجا ملس.

یئنه اؤزومو ساخلایا بیلیمیرم. «کوراوغلو! تفنگ - آداملاری، قوشلاری، حیوانلاری اؤلدورهن اولدو سلاحدی. بو، قیلینج دئییلها» - دئییرم. «آن ایچینده قیریپ خزل کیمی یئره تۆکر».

نیگار من اولان سمته ائله هوروت-هوروت باخیر، سانکی منی گۆرور. «هله تفنگ نه دی؟» - دئییرم. «بلکه سیز جوربه جور قیریجی مسلسل لردن، هیروشیمانی داغیدان بومبالاردان خبرینیز اول!»

نیگار خانیم منه ساری گلیر. یقین بو دؤنه سسیمی ائشیدیب. گلیر؛ یانیمدا دایانمیر، مندن اؤتور. کئچیب کیشی یه ساری گئدیر. اونون دؤره سینه هرله نیر. تفنگه باخیر. کیشی ایسه تفنگین لوله سینی کوراوغلویا ساری توتوب، نیگار خانیم «تفنگ بیر جور یئنی یاراقدی» - دئییر. کوراوغلونون الی قیلینجین قبضه سینه یاخین لاشیر. کیشی نین الی تفنگین لوله سینده: «باخ! بوراسیندا گولله وار. بارماغینی بو تتییه باسدیقدا گولله آچیلار».

کوراوغلو نیگارا، نیگار ایسه کوراوغلویا باخیر. من، نیگارلا کوراوغلونون آراسیندا دورموشام. اؤکوزلر هر شئی دن خبرسیز یولون قیراغیندا اوتلاییرلار. کوراوغلو الینی اوزالدیر، تفنگی کیشی دن آلسین. «وئر منه گۆروم» - دئییر.

کیشی، کوراوغلونون بئلینده کی قیلینجا باخیر. «باشینا دؤنوم، چیخ یولونو گئت! منی قان-قادایا قویما!» - دئییر. کوراوغلو دیره نیر، آندا-ماند ائله ییر. ال چکمیر کی چکمیر.

اولارین آراسیندا دورموشام. قورخورام کیشی الینی تتییه آپارسین؛ یا دا کی، کوراوغلو اوندان قاباق قیلینجینی سیییریب کیشی نین اوزرینه هجوم چکسین.

كىشى بىر آزدان جىن آتىندان دوشور، يوشانيب يولا گلىر. «قوى بىر اۋكوز سنه قوربان اۋلسون!» - دئيبىر. كوراوغلو الين قىلىنجىندان چكىب، قورشاغىنداكى بورماخلتەسىندىن^۱ آخچا يارماق^۲ چىخارىر. «بويور، بو دا اۋكوزون پولوا» - دئيبىب، تىفنگى كىشى نىن اليندىن آلىر. هر يىرىنى يوخلايب دقتلە سئزىر: «دئيبىرسن بو تىفنگ اۋكوزو اۋلدورە بىلر؟!»

كىشى تىفنگى كوراوغلودان آلىر. قونداغىنى دۇشونە باسىب، اۋكوزو نىشان آلىر. كوراوغلونون بىر الى دۇشوندىكى سازدا، بىر الى ايسە قىلىنجىندا، نىگار خانىمىن يانىندا دا يانيب منە باخىر.

تارااااق... بىر گوللە آچىلىر. آچىلان گوللەنىن سسى چۆلدە يايىلىر. اۋكوز آنسىزىن قانا بلەشىب يىرە دوشدو. او بىرى اۋكوز ايسە باش آلىب بودورە، چۆل دوزو قاچدى.

قانى قاچمىش نىگار خانىمىن ياناق لارى آغ قار كىمى ايدى. كوراوغلونون قولوندىن توتوب.

من سە اودقونا بىلمىرم. دىل-دوداغىم قورويوب. دوداق لارىم تىر-تىر تىترەيىر. ال-آياغىم اسىم-اسىم اسىر. كوراوغلونون احوالى بىر تهر اولور. بوتون كىتاب بويونجا اونو بو قىلىقدا گۆرمەمىشدىم. چالىملى^۳ بويو نەدىن سە سارسىلمىش، ايتى گۆزلىرى حىران-حىران اطرافىنى سوزور.

گۆزلىرىمى يومورام. هئىچ دە ايستەمىرم اونو بو شكىلدە، بو قىلىقدا يادداشمىدا ساخلايمىم.

^۱ پول كىسەسى.

^۲ گوموش پول. گوموش سگە.

^۳ دوروشوقلو.

ساز سسی گلیر. گۆزلریمی آچیرام. کوراوغلونون سازی دۆشوندە، قیلینجی ایسه نیگارخانیمین آیاغی نین یانیندا یئردەدیر.

نیگار غملى-غملى کوراوغلویا باخیر. منیم بوغازیما قهر تیخانیب. اؤکوزون آخان قانی کوراوغلونون قاباغیندا، زینە بولاق کیمی داش لارین اورتاسیندان اؤزونه یول آچیر. یاغیش یئنه آستا-آستا چیلەییپر؛ قانلی داش لارین اوزرینده یووارلاق شکیللی ایزلر بوراخیر. کیشی تفنگ چیینینده بیزدن اوزاق لاشیر. من کوراوغلونون قیلینجینی یئردن قالدیریرام.

داها کتابی اوخویوب، دوام ائتمەیه نه گوجوم وار، نه ده تپەریم. سطرلنمیش سۆزلر، کلمەلر ال لریمه آغیرلیق ائدیر سانکی. قول لاریم، چیین لریمدن آسلانمیش آغیر داش کیمی دیر. کوراوغلونون قیلینجی الیمده قالیب. اوخودوغوم وراق لاری گئری قایتاریرام. کتابی، میز اوسته بوراخیرام. کوراوغلو قابالارین اوستونده قوشا بولقدان گلیر. هر آدیمدا دۆشوندە کی ساز بئشیک کیمی ترپەنیر. بئلینە حمایل اولان مصری قیلینجی سانکی اونونلا بیرگه آدیملاییر.

چیراغین نور زولاق لاری، کتابین صحیفه سینه حالقاواری ایشیق سالیپر. قارانلیق اوتاقدا، یاتاغیمین قیراغیندا اوتورورب، کوراوغلویا باخیرام. کوراوغلو منە ساری گلیر...

آسلانین ارکک-دیشی سی اولماز

ای وای! ایندی هامیسی جالاناجاق. گۆر نه آياق آلتی لارینی سوروتله یه-سوروتله یه او باشدان بو باشا قاچیر! کاش من ده اونون کیمی یونگول اولایدیم. بونا باخ سن الله! من ایکی بشقابی بئله الیمده توتا بیلیمیرم؛ آتام دوغرودان دئییرها «الی نین توتومو یوخدو». گۆر نئچه استکان-نعلبکینی بیر الینده توتوب آپاریر. جانی دا یوخدو. او جیلار جانینان نئجه ده قیوراق-قیوراق هرله نیر. منه تایی دئییل کی، ایکی آددیم گئتمه میش نفسی کسلیسین. نه ائلیسیم، نه اولسون کی!

بیری یوخدو اونا دئسین کی، او استکان-نعلبکی لری یواش بیغ دا... چاق-چوق. چاق-چوق. اووووف، بیر الینده ایکی قلیان باشی، او بیری الینده ایسه نئچه دنه چای... اوره ییم قیریلانجاها. هؤیوشنه دن اؤلدوم!

آخی منه دئیین یوخدو قیز، سفته، سنه نه؟! باشینی سال آشاغی چایینی ایچ دا! اؤزوندن ینکه پوخ لار یئییب، گلیب اوتوروبسان بوردا، هله پیس-پیس ده...

داھا او جیلازا باخمییاجام. دئییر بس نه وار. قوی بئچارا اوغلان ایشین گۆرسون. گۆردون بیردن چاشدی، استکان-نعلبکی الینده قهوهخانانین اورتاسینا اوزاندی. آما یووو... یازیق دی. ییخیلیرسا، باری الینده کی استکان لار بوش اولار. یوخسا یانار، پۇشلهنر. منی قارقیشلایار، آلا-قاری^۱ دئییر، یازیغام. اؤزو ده نفرین ائله مهسه آناسی قارقیش ائدر. اونون سیر-صفتیندن بللی دیر کی، آناسی، لاپ ساققیز پارتلادان خدجه لردن بیریدیر.

آنجاق نه مزه لی اولار ایندی منه باخارکن، آیاغی میزین پایاسینا توخونسون! اورهیم خوش اولار کی، بیرى ده منه وورولوب. قهوهچی شاگرد اولور اولسون؛ نه اولار کی!

گیج رامین! ائله برک-برک یاپیشیب او قارا پیس-پیسلی دان کی، گویا گۆی آچیلیب گۆیدن دوشوب. دئییرلرها «قونشونن تویوغو قاز گۆرونر». تبریزین آغ-آپ آغ، بالیق کیمی اتلی-جانلی، قارا قاش-گۆز قیزلارینی گۆرمور کی! مایماغین بیریدیر. بیلیمیرم زنجی لره بنزهین پریسانین قاپ-قارا صفتینده نه گۆروب. اتی-قانی دا یوخدو. بوتون سور-سوموكدو. اونون چیلپاق جانینی حمامدا گۆرمه لییدی با. اوتولموش تویوغوندان سئچیلمز. گیج رامین! آنجاق ائله پریسا، او، دووشان دیشی ایله قیریلداسین، قیرجانسین، هیریلداسین، ازلیسین، بوزولسون، اونون دا عقلی گئتسین.

رعنا دئدی ها «شراره! دیمز! تاچ اسکرین نوکیا نه دیر کی، اوندان اؤترو گئدیپ، او قدر کیشی نین ایچینه گیره سن». اونا دئییه بیلمه دیم کی، منیم دردیم نوکیا دئییل...

^۱ هرزه سؤز.

دوغرودان دا دیردی می؟! سفئه لمیشدیم مرج ائله دیم! کیمه گۆره آخی؟ نه اولسون کی؟ رعنا هاردان بیلسین کی... کاش ائله دردیم نوکیا دردی اولایدی. آغزیمدان سؤز چیخان کیمی آتام هله نوکیا سهل دی، آپل ده آلاردی.

نه بیلیم! منیم، ائله بو لوتوباز لیغیم، همیشه باشیما بلا اولور. اوغلان لار منی اؤز لرینه سیرداش بیلیر لر. سفئه م دا... ائله آنجاق قیز لار لا اونلارین آراسیندا سؤز آپاریم-گتیریم. گۆر نئچه دفعه کؤنول سوز-کؤنول سوز، رامین له پریسانین آراسیندا سؤز داشیمیشام! هله اوندا بیر او قدر اولزلی آچیلما میشدی.

او گون ائله رعنا «دش باشیوا قیز! آز اونا-بونا قوللوق ائله، اؤزووه بیر چاره قیل» - دئینده، نییه ناراحت اولدوم؟! دوز دئییر داا. اوچ ایل دی دانشگاهدا اوچ تۆره لی آدام منه راست گلمه ییب. گۆروروم! منی بیهنن ائله بو قهوه چی شاگرد اولاجاق... ای وای جانین یانسین اوغلان! ائله بیل عملی آزیب. گۆر نه ده گۆز آلتی منه باخا-باخا فیر-فیرا کیمی فیریلدا ییر! گیچ رامین! بو جیل ازین قاداسی سنه گل سین؛ بونجا دا اولما دین. بورا باخ! گۆره سن او نارنجی کؤینک له بیر-بیر لرینه نه دئییر لر؟ حتماً مندن دانش شیر لار ها...

جانیم نییه بئله قیزیشدی؟ من کی اوتانقاچ دئییلیم. هر گون دانشگاهدا یوز نفری نن اوز-اوزه دورورام. اما نارنجی کؤینه یین گۆز لریندن بللی دیر کی، سامان آلتیندان سو یثردن، یئر آلتیندان یاسا گئندن دی ها... لاپ جله سین ی قیرمیش اوچ توله مه دی. الینده کی تسیحه باخ! دنه لری ائله بیل یاشیل شاردی.

آنجاق بوینوندا قوچو دستمالی اکسیک دی. گۆر نئجه ده قلیانی خورولدا دیر! زهلم تنباکی ایی سیندن گئدیر. واخ-واخ. بورنوم آجیشدی، مین رحمت سیگارا. سفئه له میشم ها. آخی بهیم سیگارین اؤزو ده توتون دئییل؟! نه بیلیم توتون دا اولسا، اونون ایی سینه عادت ائله میشم. ائوده آتام فیسقیر دیر، دانشگاهدا رامین له

یولداش لاری. شکر الله قارداشیم دا مرخصی یه گلنده، آتام دان گیزلین اوتاغیندا توستوله دیر. آما قلیانین قوخوسو بوغازیمی آجیشدیریر. گۆزلریمی سولاندیریر. یقین گۆزلریم قیزاریب.

واللی! قهوه چی نین یانیندا اوتوران گۆر نه باباما اوخشاییر! یووووخ... بابامدان بیر آز یاشلی دیر. الله ائله مه سین بیرى منى بوردا گۆرسون ها. بابام بیلسه مرج ائله ییب قهوه یه گلیمیشم نه دئیر!

بیلیرم: «گۆزوموز آیدین! قیز نه دی بو ایش لر نه دی؟ قهوه هارا، سن هارا؟ یاخشی منى بی آبیر ائله دین» - دئیر. «منى ائل-آدام ایچینده رسوای ائله دین؛ ایندی آناوین سوموکلری قبرده تیر-تیر تیتره ییر».

باخ اورا. دئدیم به قهوه چی شاگرد یازبقدان زاددان دی! نئجه ده استکان یویان قوجا کیشی ایله دیک به دیک دئییشیر. گۆر نئجه یاز بیغین بئلی بو کولوب. قوپ-قورو قاحدی ائله بیل. بیر درى، بیر سوموكدو. سیگار دوداقددا استکان یوماغی دا گۆروردوم. یاخشی، والله تازا ایشدی. آما او دا دئیسه سن قره چی دی ها، سیر-صفتیندن تۆکولور. دئ داا نییه قهوه چی شاگرد بدبخت کیشینی گونون گون اورتا چاغیندا گۆزو باخا-باخا یئیر! نه بیلیم؛ بلکه ده آتاسی دیر!؟

هن! اینده مژمئی گلیر. منه گتیریرها. کاش پیتی ایسته یردیم. آما دوغروسو اوتاندیم بو قدر کیشی نین ایچینده تیلته دوغراییم. کبابین چۆره ک دوغراماسی یوخ، یئمهی ده راحت دی. ایکی-اوج بلله یه هؤپودرم.

قوی استکانی قیراغا چکیم. آز قالمیشدی یادیمدان چیخسین. رامین، قهوه یه گیرمه دن سانکی هر هانکی بیر موسیقی نی دیل آلتی پیچیلدا ییردی؛ منه دئدی: «چاین بیرى فایدادی، ایکینجیسی فایدادی، اوچونجوسو نحس دی، دؤردونجوسو دا بس دی، چیخدی بئشه، وور اون بئشه! چای ندی؟ سای ندی؟»

بیر ده دئدی «یادیندان چیخماسین قهوهده چای ایچمک ایسته‌مه‌ینده، نعلبکینی استکانین باشینا چئویرلر. اوندان چایین آردی کسلیر. قهوه‌چی لر آراسیندا عادت بئله‌دیر».

قوی جهتم اولسون. انشاءالله او جیلار جانیلا تپه‌سی اوسته یئره ییخیلار. من دئییردیم بس یازیقندان زادان‌دی. دوزسوزون بیر دوزسوز! روف مژمئینی میز اوسته قویارکن ساغ اول! - دئدییمده گؤزلری پاریلدادی. ائله‌بیل عمرونده قیز گؤرمه‌میشدی. دلی آچیلدی سفه‌هین بیر سفه! استکان-نعلبکینی گؤتورنده منه دئییر «خوشگل خانیم! نهم-باجیم یئرینده اولاسیز. قهوه‌نین عادت‌لرین یاخشی بیلیرسیزها!». آز قالدی مژمئینی باشینا چیرپیم. شیطان دئییر کی، دور قهوه‌نین اورتاسیندا قولاغی‌نین دیبینی قیزدیر. آلاهم‌دان دیر بو دفعه‌ الینده چای گتیریرکن، تپه‌سی اوسته یئره گل‌سین.

ای‌وای! بو نه‌دی؟ اوله‌سن، قان انده‌ره‌سن پیشیک! منی نییه بئله دیسکیندیردین؟ باخ گؤر نئجه‌ هامی منه گولدو. هله قهوه‌چی‌یه باخ. اوتانمیر، نوه‌سی بویدا قیزا گولور. نه وار؟! هاردان بيله‌یدیم آیاغیما سورتوشن پیشیک‌دی! قهوه‌ نه‌دی، پیشیک نه‌دی؟ آخی مگر بورا قصاب توکانی‌دی؟!

بیری یوخدو بو قهوه‌چی‌یه دئسین منه گولدویون یئرده، باشی‌نین اوستونده، دیوارداکی شکل‌لره گول‌با!! ماشاءالله بیر بیریندن گؤزل دیر. پاپاقلی یا باخ! گئیدی یا او کت-شلوارا باخ! ائله‌بیل سیچانی توربا یا سالیبلار. دئییرم دیوارا شکل آسیرسان باری عملی-باشلیسینی آس‌دا. گئنه او ضریح قاباغیندا دوران. گؤر نئجه ده ادب-ارکان لا‌الینی دؤشونه قویوب! ائله‌بیل قهوه‌یه گیرن‌لرین قاباغیندا ایکی قات آیله‌جک.

آغا بابامین دا بئله شکیل لری واریدی. آما آغا بابام اوندا اوشاق ایدی. آتاسی نین یانیندا ضریح قاباغیندا دوروب، او دا الینی سینه سینه قویوب. شکیل ده چوخ دوزلو، گۆیچک گۆروشور.

آما نه گولمه لی اولور اگر قهوه یه گیرن لر، قهوه چی یه دئییل ضریح قاباغیندا دوران کیشی یه سلام وئرسه لر! بونو رامینه دئییه جم. او میرتجیل دی. بئله سۆزلردن اؤترو اؤلر.

بیری بوخدو منه دئسین، باشینی آشاغی سال خوره یینی یی داا. یقین رامین دیبده-بوجاق دا دوروب منی گودورها. دئییردی بس اوتانا جام. قهوه یه گیره بیلیمه جم. نه دیر کی؟! دوز دئییردین پریسانی قهوه یه گؤندرردین! او گلسه پدی، ایندی سیچان کیمی میزین دالیسیندا گیزلنمیشدی؛ زاغ-زاغ اسیردی. بلکه ده بو آج گۆزلو پیشیک اونو یئمیشدی. گۆر نئجه ده یاشیل گوزلریله منی سوزور؛ گۆزلی، نارنجی کۆینه یین الینده کی تسبیحین دنه لرینه اوخشاییر. قوی بیر پارچا کباب قوپاریب قاباغینا آتیم؛ یوخسا اونا یئمک وئرمه سم ایلان لاری گلیب یوخودا منی سانجار.

ائله بیل بینمه دی. قارنی توخدو. نه اولدو؟ هارا گئتدی؟ بورا باخ. نه ده حیالی پیشیک ایمیش. دئییه سن، چینی قابدا قویماقدان پای اومان پیشیک لردن دئییل هاا. کبابی صندلین آلتینا چکیب، اوردا یئییر.

دئیینه قوجا قهوه چی، بو پیشیک دن اؤیرن داا. منیم پیشیک دن چکینمه ییمه ائله گولورسن کی! یاشیندان اوتانیب، بیر سۆز دئمهدیم. گئندنه اونا دئییه جم؛ بیرینی لوغازا قویاندا هئچ اولماسا اوزونو باشقا طرفه چئور، الینی آغزینا قوی!

آاا. او نه دیر، او کیشی نین آیاغی نین یانیندا؟ چلیک؟ آیاق عوضینه چلیک؟ گۆزلیم گۆره سن ترس گۆرمور؟ دئییه سن او، بیر آیاقلی دی. یازیق. اوره ییم خراب

اولدو. من ایکی آیاغیملا، ایکی آددیم دوز یول یئرییه بیلیمیرم؛ بو کیشی نئجه بیر آیاقلی یئرییر!

نه ده شاققاواتلی، یاخاسی گؤر هاراجان دا آچیق دی. واخ-واخ. سینه سی نین توکلرینه باخ. قاپ قارادی. دئین یوخدو یاخانی باغلادا. نه دی بئله؟ آدامین زهله یی-زندى گئدير. یقین کی، بدنینه یارا ایزی چوخدو. آیاغی ائله اولسا، گؤر بدنی نئجه دی!

ائى اى اى. زهلم گئتمیش، سفئه آدام! آخماق کیشی! دئیر بس کیم دی! هله اوتانمیر او آیاغی نان منه گؤز ده وورور. گؤر بو ایکی آیاقلی اولسایدی نه ائیلردی؟! الله داغینا باخار قار وئر. دوز دئیب لر؛ دوه نین قانادی اولسایدی بیخمامیش دام قویمازدی.

... دئینه سن بوردا نه غلط دارتيسان؟ سن ده ائله اونون یئرینه اولسایدین، اتلی-جانلی بیر یسینی گؤرسه دیدین، گؤز وورماق سهل دی، بلکه بیر ال ده اوزا داردین. ائله من ده ده وار آخی! اوتانماز-اوتانماز تک باشیما گلیب گیرمیشم بیر بئله آج گؤز کیشی نین ایچینه. هله خالخال ایراد دا توتورام. یقین گؤزلرییه ایندی منیم بوی -بوخونومو آتدان، اوسته اولچورلرها.

یاریم ساعت ده اؤتسه یدی دوروب قاچاردیم. رامینین ده موبایلی تپه سینه دیسین. نه اؤزونو ایسته بیرم نه ده موبایلینی! هئچ غیرتی یوخ ایدی. آغزینی آجیب بیر کلمه ده دئمه دی گئتمه! من نه بیلیم قهوه نئجه یئردی. بوردا نه یوخ یئر لر. ائله او قوروموش، قازالاح پریسا اونون باشیندان دا آرتیق دی. من سفئه. قوی ایکیسی ده جهنم اولسون.

او یاراشیقلی، گؤیچک اوغلانین یانیندا اوتوران، گؤر نئجه ده گؤزومه تانیش گلیر. اولمایا قونشولاریمیزدان اول. یووو. بیزیم ائله قونشوموز یوخدو. بس هاردا

گۆرموشم؟ هن. ایندی یادیما دوشدو. لاپ ائله اؤزودو. آغا بابام گیل ده قلیان کوپونون اوستونده کی ناصرالدین شاه دیر. گۆر نئجه ده قلیان داماغیندا نشئه له نیر. آغا بابام بوردا اولسایدی، دئییردی، او یانیندا کی دا «ملیجک» دی. من گیج! هله ملیجکین کیم اولدوغونو تازا بیلمیشم. ائله بو گون ده دانشگاهدا رسم اولوب. ساچ لارین اوزالماتق لاری بس دئییلدی، قاش لارینا ساپ دا سالیرلار. پوخ یئدی قیزلار!

هله اوگون رعنا دئییردی بیرى گۆزلرینه مداد چکيب، معلمین قاباغیندا اوتورموشدو.

او پنجره قاباغیندا اوتوران گۆر نئجه رامینه اوخشاییر! ائی ائی ائی. ائله اؤزودو. نه وقت گلدییینی گۆرمه دیم!

ائله بیل منی تانیمیر. حتماً پریسا قوروب گۆندریب. بس کی فضول دی. قوی یانسن تۆکولسون. قهوه دن اونا هئچ نه دئمیه جم.

بس کی گۆزوم اوردا-بوردا قالدی، کبابین یاغی دوندو.

آخ اای. یاریم ساعت قورتاردی. قوی ائله بو کبابین هامیسینی پیشیه وئریم؛ یازیق دی، حیالی پیشیک دیر.

رامین خان! باخ گۆر ایندی نئجه ده دیم-دیک بو قدر کیشی نین اؤنوندن سوووشاجام. سن ائله گئت او قارا پیس-پیسلی نین دالیسیجا سورون. هر یئرده جار سال کی، شراره ال-آیاق سیز دیر. هله باخ! بیر ایش ده گۆرورم آغزین آچیلدا قالسین. قوی الیمی باغریما قویوم. قهوه چی نین باشی اوستونده، ضریح قاباغیندا دوران کیشی یله ساغ اول لاشیم.

نئیه دیم کی! قهوه چی نین گۆزلری نییه تپه سینه چیخدی!

بدمجانی رنگلی مزدا

هیچقیرا-هیچقیرا پیلله لردن ائیب، اورتا قاپیدان پارکینگه دوغرو گئدیر. ماشینا یئتیشمه‌میش سیویچین دویمه‌سینی باسیر. تیققیلتی سسی گلمیر. بیر داها بارماغین on دویمه‌سینه باسیر.

ایچینی چکیر. پالتوسونون جیبینی آختاریر. اپریمیش کیرلی کاغذی دسمالی جیبیندن چیخاریر. دسمال الینده پرن-پرن اولور. یئرہ تۆکولن دسمال قیرینتی‌لارینی آیاغیلا ماشینین آلتینا اؤتورور. پالتوسونون یئنگی‌سی^۱ ایله بورنونو سیلییر. قارا ماهوتی پالتوسونون اوستونده آغ بیر ایز بوراخیر. قولونا باخیب کیرلنمیش یئنگینی بؤیرونه سورتور. بورنونو چکه-چکه ماشینین قاپیسینی آچیب فرمان آرخاسیندا اوتورور. اؤز-اؤزویله دانیشیر.

^۱ اوست کؤینک، یا دا پالتارین بیلکده دوران حصه‌سی. دستک.

«اؤله سن رويا، اؤله سن! بو نه زندگانليق دى آخى! ائله دوز دئييب لرها، چوخ محبت دن مرض حاصل اولار. بيليرم. آرپاسى آرتيق دوشوب. يازيق عمه م. ارى ايله ساواشديقدا، يونجاسى آرتيق دوشوب دئيردى، هاميميز گولرديك. ايندى بيليرم نه چكيب؛ يازيق عمه خانيم! آرپايلا يونجانين بير او قدر ده فرقى يوخدور كى. ائله عمه مين ارى يله، احمدين اينك ايله ات قدر فرقى وار. ايكي سى ده بير بئزين قيراغيديرلار.

اما من اوزوم ده آرپا چوره ييني چوخ سئويرم. قارنيم سانجیلانمايانا قدر دسترخاندان قيراغا چكيلمرم. احمد يونجانين اوزونه ده باخماز. آخى نئجه دئييم يونجاسى آرتيق دوشوب. دئيه بيلميرم كى! دئمه ميشم ائله بئله اولوب داا. هله يازدا كورپه اوهدورانى^۱ دوزلويوب يئينده منه گولر. هئچ اينك ده سنين كيمي شيرين-شيرين يونجا يئيه بيلمز - دئير.

احمدين آرپاسى آرتيق دوشمه سه يدى ده، ات كيمي كيشنه ييردى. دلى اولموشدو ائله بيل. من نه دئديم كى «هامى نين اوزونه گولورسن كى، مينيرلر داا سنى». پيس دئديم؟! مينمه سهر، گونده او ماميلی-ماتان خانيم منيم ماشينيمدا نه پوخ يئير؟ ماشينا وام گؤتورن من؛ آلان من؛ سن ده گونده خانيمي قاپى لاريندا ائندير. من ده هر گون مجبور اولورام كمالى نين ماشينى يلا ائوه گليم. هله نه ياخشى دئمه ديم هاا كمالى منى ماشينى يلا ائوه چاتديرير. يوخسا فيش-فيشا كيمي فيشيلداردى. اونون آجيجى توتسا دا، لاپ ياخشى ائليبيرم، گليرم. كمالى قونشوموز دوداا. يول اوسته منى ده گؤتوروب، يئتيرير قاپمميزا؛ نه اولسون كى!

باشينى سندنله سؤيکه يير. گؤزلرينى يومور.

^۱ يونجانين ايلك بيچينى.

قوی بیر آز اؤزومو تاپیم، جهنّم اولوب گندهرم. گؤروم صاباحدان هانسی ماشین لا خانیمی قاپی لاریندا ائندیره جک؟

بیر داها او ائوه دؤنمه یه جه یم. قوی نه قدر تک باشینا های-کوی سالی ر سالسین. اوزون قولاق کیمی آنقیریب، اؤز تاینینی تاپسین. هوشو چاتمیر کی! دوشونمور بو ساعتده قیشقیر-باغیر سالمازلار؛ قونشولار یاتیب. اؤزو ده بئله قوزو کیمی قونشولار، بیرسی نین ده جینقیری چیخماز.

سحر فریبا خانیم سوروشسا نه های-کوی سالمیشدیز، نه دئییم؟! هئی اوزومو دیرناقلادیم. هئی دیزیمه چالدم، پیس ایشدی، یواش دئدیم. مگر قولاق آسدی! قوی تک قالسین، باشی داشا دیسین.

باشینی فرمانا سؤیکه بیر. آلتی اوشویور. گؤز یاش لاری دیزلرینه دامیر. بورونونو ائله چکیر کی، بیر آن نفسی قاپانیر. چرقدی نین اوجویلا گؤزونو سیلیر.

«عمه م دئیردی هاا کیشی نین وفاسی اولماز. هئچ بیر دئمه دی گئجه نین بو ساعتینده هارا گئدیرسن؟» «گئتمه» دئسه دیدی، ائودن چیخمازدیم. بو سویوقدا بوردا نه غلط ائلیرم آخی. ها آددیم لاریمی آستا آتدیم، ها باشماق یئرینده قوردا لاندیم، بلکه او بیردی دفعه کی کیمی «گئتمه» دئسین؛ نامرد اوغلو آغزینی بئله آچمادی.»

بورونون سویو آخیر. باشینی فرماندان قالدیریب، سینه ده کی دسمال قوطوسونو گؤتورور. قوطو، بوم-بوش. حرصیندن قوطونو آرخایا آتیر. دالی شوشه نین قاباغیندا کی ایته دییب، صندلین اوستونه دوشور. قولچاغین باشی، گورا تیتیره نین باش کیمی ترپه نیر.

چرقدی نین اوجویلا بورونونو سیلیر. بورونون سویو چرقدین اوجوندا آغ لکه بوراخیر. چرقدین لکه لی اوجونو پالتوسونون آلتینا ییغیر. سیویجی سالیب

ماشینی ایشلتمه‌یه چالیشیر. ماشینین موتورو تیر-تیر تیریلدايیب، سونرا سسی کسلییر. فرمانین آلتینداکی میلچک بویدا ایشیق وار؛ ایشیغا باخیر. باشیل ایشیق یانیر.

«هله اون ایل‌دیر تصدیقیم وار دئییر. هوشو چاتمیر کی، ماشین گاز ایله ایشله‌ینده موتورو سؤندورمز. بو دا اون ایل‌لیک شوفر!»

باشیل ایشیغی سؤندورور. قیرمیزی ایشیق یانیر. یئنی دن ماشینین موتورونو ایشلتمه‌یه چالیشیر. موتور کهلیک کیمی قیققیلدايیر. او ایسه گولومسه‌ییر.

«بیلییرم‌دا، ایندی پنجره قاباغیندا دوروب گودور. دئییر بس عاجزم، گنده بیلمرم. بس دئین یوخ بو تصدیقی نه دن اؤترو آلمیشام. کیفیم‌ده ساخلايیب،

چوروتمه‌جه‌یم کی! تصدیق؟ قوی یوخلايیم گؤروم کیفیم‌ده؟»

موتورو سؤندورور. کیفینی یوخلايیر، قوردا لاییر. ایچینده کی لری بیربه‌بیر صندلین اوزرینه تۆکور. سونوندا کیفی ترسینه چئویریب قوجاغینا سیلکه‌له‌ییر. بیر-ایکی سکه، جولو بارماق بویدا گؤز مدادی، قاپاق‌سیز بیر ماتیک آیاغی‌نین آلتینا دوشور. یئنه اؤز-اؤزویله دانیشیر.

«گیج‌سن، قوش‌بئیین خانم، گیج! بس دئمهدین تصدیق‌سیز سیویج نه درده

دیر؟ هوشون باشیندان چیخمیشدی؟ ائله شیشدین، ال آتیب سیویجه گئدیرم

دندین؛ ایندی بویور گئت! گؤزه‌ک نجه گنده‌جکسن؟ اولماسا بیر آز گودوم

یاتسین. آستاجا قاپینی آچیب ائوه گیرم، تصدیقیمی گؤتوررم. او یاتاندا، مین

ایلین اؤلوسودور ائله‌بیل. داش کیمی دوشور یاتیر. ائوه قاییتدیغیمی بیلمز. اما

بیلمیرم کی، سیویجی هارایا قویموشام. گره‌ک بیربه‌بیر کم‌دلاری آختاریم.»

صندلین اوستونده کی قیویر-زیویرلاری کیفینه قایتاریر. آیاغی آلتینداکی

سکه‌لری گؤتوروب، باشینا دولاندیریر. سونرا دنده‌نین یانینداکی تصدق قوطوسونا

سالیر. سگەر، ماشینین سس سیزلیینده جینگیلده بیر. گۆز مدادینی دیزینه سورتوب قاپاقسیز ماتیککی بورور. لوله، بوش-بوشونا بورولور. لوله نین ایچینی پوفله ییب، بیر ده ترسینه بورور. ایکیسینی ده کیفین کیچیک زیپالی یئرینه قویور. ماشینین آیناسینی اؤز اوتوروشو و بویونا اوغون دهته ییر^۱ قاش لارین یوخاری قالدیریر. گۆزگوده گۆز لیرنه باخیر. الینی قاش لارینا، گۆز قیقی لارینا^۲ چکیر.

«گۆز لیرمین آلتی شیشیب. سحر ایشه گئنده آغلا دیغیمی هامی بيله جک. هئچ کیمین اوزونه باخمییا جاغام. سوروش سالار نه دئییم؟ آچیب آغارتمالی دئییل کی. دئسم ده اینانمازلار. آنام دا اینانماز. هئی تعریفله سین، دئسین احمد نجیب اوغلان دی. ائلچی لیک گونو تلفندا، عمه خانیمما بیر ساعت اونون نجیب لیییندن دانیشدی. او قدر دئدی کی، آخیردا یورولوب دئدیم: من اونو گۆررکن «باغلار باغیندا» بوینوندا تورباسی اولان آتلار یادیمما دوشور. آنام حرصلندی. دیلینی دیشله - دئدی. بویون-صاباح او سنین ارین اولاجاق آخی! هر شئی ظارافاتلا یاناشما - دئدی.

بیر دفعه من ده او آتلارا میندیم. اؤلدوم اریدیم. آبیر-حیادان دوشدوم. آت ایکی آدیم آتامیشدان دایانیب هامی نین قاباغیندا شیر-هاشیر ایشه دی. قوم لارین اوستوندن ائله پیس قوخی قالدی کی، اوره ییم بولاندی. هله اوره ک بولانما بیر یانا، منی گۆرن جماعتین یانیندا یئرله گیرسه یدیم آت اوستونده اوتورماقدان مین قات یاخشی اولاردی. ائله بیل او آدم لارین گۆزونون اؤننده اته ییمی قوازامیشدیم. آت شاهه قالدیب منی یئرله چالسایدی، بو قدر قانیم قارالمزدی.

^۱ دهته مک: دقیق لشدیرمک، معین لشدیرمک.

^۲ گۆزون اوستونو اؤرتن پرده.

احمد دوغرودان دوغروسو بو گئجه آز قالمىشدى منى گۆتوروب يئره چىرپىسېن. هله نه ياخشى اوتانقاجدى. اۆزگه لرېن يانېندا حرمت ساخلار. حرصىندن دىرناق لارېنى چئىنر. بارماق لارېندا دىرناق قالمايىب كى. دىرناق لارېنىن آلتىنداكى قىپ-قىرمىزى ات ائشيه پىرتلايىب. ايندى بىلرم نيه دلى اولدو. گۆرەسن نه ائلييىر؟ ياتىبمى؟ يوخسا تلويزيونا باخا-باخا دىرناق لارېن يئنه چئىنەيىر؟»

آينانى بىر آزجا آشاغى ائندىرير، بىر ده اۆزونه باخىر.

«رويا خانىم! آخى سىن عىبىنى هئى باشىنا قاخىنچ، اوزونه توخونج ائله سەلر، خوشونا گئدر؟ ايندى ائوه دۇنمەيه هئچ اوزون اولاجاقمى؟ نه ائبلەدى كى! قولوندىن توتوب كاناپەيه چكدى. نيه ائله دئدىن آخى؟ سەن دئسەلر كى، دىرناق لارېندان چىمچە شىرم، مەنە الينى اوزالتمە، خوشونا گلر؟ ائوه دۇنمە دىرناق لارېنا هئچ فەكر وئرمەيه جەيىم.»

آيناي باخىر. آرخا شوشە نىن ائەيىندە كى ايت، باشىنى تىترەدە-تىترەدە آينادان اونا باخىر. سانكى اونو حاقلايىر.

ماشىندان يئره دوشور. پاركىنگىن قاپسىنى آچىب ائشيه گۆز گزديرير. ايشىق دىرەيى نىن لامپاسى نىن بالونو يئكه بىر دوزدان دىر سانكى. دوزو يئره سەلەيىر. يئره هله آغارمايىب.

«قار آغىر ياغسا، گئدە بىلەرم. قوى يوخارى قالخىم؛ قايىيا قولاق ياتىردىم؛ بلكە ياتىب.»

قايىنى ايشىگىلەيىب، آستا-آستا يوخارى قالخىر. ايكىنجى قاتدا بوتون ائولرېن ايشىق لارى سۇنوكدور. اوچونجو قاتدا اورتانجىل قونشونون ايشىغى، قايى نىن

باشینداکی شوشه‌دن پیلله‌لره دوشور. دوردونجو قاتا چاتدیقدا گۆیرچین کیمی بارماق‌لاری‌نین اوجوندا یغریییر. قولاغینی قاپییا دایاییر. تلویزیون سسی گیلر. «هله یاتماییب. ائله آلاهیاندان ای‌میش من ائودن چیخیم. آغزیمی آچاندا، دینمه! اعصابیم خرابدی، دانیشما! بانک حساب‌لاریمی قاتمیشام. حساباتیم یئرسیز چیخیر، نه قدر سالیب-چیخیرام یئنه ده آز گتیریرم! ائله هامی‌نین یانیندا آز گتیریر. بیر ائله منه آرتیق گلمه‌یی باجاریر. آنام هاردادی گلیب گۆرسون، همین نجیب اوغلان نئجه ده تک‌باشینا موسیقی ییغیناجاگی قوروب. باخ گۆر نئجه ده سس گلیر!

دلی شیطان دئییر قاپینی آچ، ایچری گیر؛ گئت گۆر نه‌یی ایزله‌بیر بئله؟ یقین پورنو فیلمی‌دی‌هاا. آشپزخانادان یامان بویلانیردی، رکلامینا باخاندا گۆردوم. دئیینه قیچین سینسین، ائودن نییه چیخیردین کی. سن خاراباندا اوتورسان، او دا اؤز بیلدیینی ائله‌مزدا!».

پوسقودا دایانان پیشیک کیمی، بیر ده قاپییا قولاق یاتیردیر. ایچریدن گلن سسی یاخشی ائشیتیمیر. آشاغیدان، پیلله‌لردن سس اوجالیر. دئییه‌سن یوخاری قالخان وار.

«سس ائله‌مه! پیس ایش‌دی. ساخلا ائوه، قونشولار یاتیب.»

«ای‌وای! بو سس فریبا خانیمین سسی‌دیر. ایندی نه ائله‌ییم؟ منی بوردا گۆرسه، نه دئییر؟»

بیر قاپییا باخیر، بیر ده ایلیب نرده‌دن یوخاری قالخان‌لارا باخیر. نه ائیله‌سین، بیلیمیر. باشماق‌لارین چیخاریب الینه آلیر. پیلله‌لرین اوجونو توتوب، اوغرون-اوغرون دام یولونا قاچیر. آشاغی‌دان گلن سس گئت-گئده اوجالیر، یاخین‌لاشیر. اونون ایسه آیاق‌لاری اوشویور.

«كۆپەيىن قىزى! بىر-يېقىنلىق-باشلىق-ئادام گۆرۈندە، ئۆزۈندىن چىقىرى. سەن كىم دىدى دورا ئوينا؟ ئالە بىرچە كىشىلەرنى قىرغىنىدا قىرغىنغا قالمىشىدى؟ ھا دىيىم دىنمىيىم، اولمور كى، اولمور».

«سەن ئالە دىنمە. قونشولار ياتىپ. قولى ئوۋە يىتىشك، نە قىر دانلاياچاقسان دانلا».

«ئىنە ئوۋە يىتىشىرىك، تويۇق كىمى مېسىر. دىل تۆكۈر. يالوار-ياخار ئالەيىر، بالاخ. آخشامدان ئۆزگەلەرنى ياندا شۇر اولموشدون؟!»
«دىنمە. سەن ئالە دىنمە. قونشولار ئىشىدر».

دام يولوندا دىوار دىيىنە سىخىشىپ. ئىشىتىدىكەلەرنە اينانا بىلىمىر. چۈنكى فېربانى، آپارتمانىن ان خوشبخت خانىمى ساناردى. فېربا ھىمىشە ياراشىقلى، گۈل اوزلويدۇ. بىر دىيىپ مېن گۈلردى.

پىللەلەردەكى سىس كىسىلدى. باشماق لارى اليندە پىللەلەرنى ئاندى. ئىنە قولايىن قاپىيا دايدى. سىس كىسىلىشىدى. كور-پىشمان پىللەلەرنى آشاغى ئاندى. اوچونجو قاندا باشماق لارنى گىئىدى. آياق لارى سويۇقدان دونموشدۇ. پاركىنگە چاندى، قاپىنى آچىپ دىوارا دايدى.

«ئالە تصدىق سىز گىدەجەيم. گىجەنەن بو ساعىتىندە پىلىس-مىلىس ھاردايدى؟»
قار، پاركىنگەن آچىق قاپى سىندان ايچرى سېلەنەر. ماشىندا اوتوروب موتورو ايشلەيدىر.

«آخ ئائى! ايشلەدى دىئەسەن. گل ايندى بو دوۋە ئۆلۈسونو قاپىدان ئىشىيە چىخارت. بىر آزدەقلى اولسام، بىر-يېقىنلىق فرمانا چىخاردارام. نەدىر كى؟ دىفەلەلە گۆرمۈشم، احمد ماشىنى پاركىنگەن نىچە چىخاردىر. دالى دندەيە آتىپ، اوچ فرمان ساغا، يېقىنلىق فرمان سولا، سونرا دوم-دوز ئىشىيە چىخارام. قولى ايناندا

باخیم. اااا! کئشگه او ایتی یئریندن گۆتورردیم. آرخایا باخاندا، باشینین

تیترمه‌سی فکریمی جایدیریر. آهان! بو بیر فرمان، بو ایکی...»

تاققیلیتی سسی گلدی. آیاغین ترمزا باسدی. ال ترمزونو قالدیردی.

«ای‌وای! نه اولدو؟ بو سس نه ایدی؟ اولمایا فریبا خانیم‌گیلین ماشینینا

توققوشدوردوم؟ یوخ‌هااا! الله ائله‌مه‌سین.»

قاپینی آچیب یئره ائندی. ماشینین آرخا گیلگیری، فریبا خانم‌گیلین بادمجانی

مزدا-۳ لرینه دایانمیشدی.

«ؤله‌سن رویا! اؤله‌سن! ایندی نه دئییه‌جکسن؟ گونده یوز دفعه بو ماشینا داروگر

فیسیلدادیرلار. سیله-سیله، پوفله‌یه-پوفله‌یه ساخلاپیرلار. اوووف! گۆز نئجه ده

جیزیق سالیب. ایندی نه ائلیییم؟»

اوشویور. جانی گیزیلده‌بیر. گیزیلتی کورک‌لریندن آیاق‌لارینا قدر یاییلیر.

پارکینگین قاپیسیندان قار شوتویور. سویو سوزولموش کیمی گئدیپ پارکینگین

قاپیسینی باغلاپیر. قار اوستونده، آیاق‌لارینین ایزی قالیر. ماشینا

یاخینلاشدیقجا، یاش باشماق‌لارینین ایزی یئر اوزرینده گئت-گئده کیچیلیر.

ماشینین ایچینده اوتورور.

«گۆر سورمه‌میشدین! هاچان هوش-باشینی بیر یئره بیغاجاقسان قیز آخی! هله

منه تصدیق‌سیز ماشین سورور. آدام کیمی پارکینگدن چیخارتماغی اؤیره‌ن

سونرا احمده بوی دئی. دوغرودان احمده نه دئییه‌جیم؟ احمد جهتم، فریبا

خانیم‌گیله نه دئییم؟ اولماسا گئدیم احمدی چاغیریم. یووو. اونا یالوارمایاجام.

دئسم آجیق آچدین - دئیر. گئجه‌نین بو ساعتینده قیشقیر-باغیرا حوصله‌م

یوخدو. قوی ائله ماشینی یئرینه قایتاریم، سحر فریبا خانیمین ارینه دئیرم.»

ایله جی ائندیریر. آیاغین گاز! باسیر. موتورون سسی پارکینگه دولور. ایندی ایسه فرمانی، عکس طرفه - سولا قایتاریر. دا!!!انق! آیاغینی ترما باسیر. ایکی اللی باشینا چالیر. ماشیندا اوتورارکن، قاپینی باغلاماغی اونودوب، ماشینین قاپیسی مزدانین شوfer قاپیسینا دایانیب. اؤزونو یامان لاییر.

«عقیلسیزین بیرى عقیلسیز! بو نه ایشدی؟ گلدین قاشین آلاسان، گۆزون چیخارتدین؟»

فرمانی بیر آزجا ساغا قایتاریر. ماشینین قاپیسی، مزدانین ازلیب-جیزیلیمیش قاپیسیندان آرالانیر. بادمجانی رنگین اوستونده، آغ پرایدین ایزی قالیب. ماشینین موتورن سۇندوروب اوتورور.

«آخی بوآداما دئین یوخ کی، یئر قورتولموشدو بو آت النگهسینی گتیریپ بیزیم ماشینین بؤرونه سوخوموسان؟ ایندی باشیما نه داش سالیم؟»

اوشویور. گۆزونون یاشی قورویوب، آغلیا دا بیلیمیر. دالی صاندىقدان پتو گۆتوروب، ماشینین ایچینه قایدیر. پالتوسونون جیبیندن موبایلینی چیخاریپ بیر مئساژ یازیر. «من تصادف ائله میشم!» - یازیب، احمدین نومره سینه گۆندریر. باشینی صندله سؤیکه ییر، پتونو بورنونا قدر چکیر. ایستی نفسی بورنونون اوجونو قیزدیریر.

«رویا خانیم! بو دفعه دوغرودان دا اوتانا جاقسان. بو دفعه جماعت، آتین ایشه مه- یینه دئییل، یول پلیس لری ایله بیرلیکده سنه گوله جک لرھا. دئدی قودولار باشلا یاجاق. قونشولارین دیلیندن دوشمی ه جکسن.»

گۆزلرین یومور. پلیس ماشینینین قیرمیزی ایشیغی گۆزلرینده یانیر، سۇنور. یانیر، سۇنور.

سس سیزجه آشاغا سورونن پیلله لر

آخشام دی. هر کس ائوینه ساری آدیملاییر. او ایسه آستا-آستا گئتدی بی هر گونکو یئره یاخینلاشیر. نئچه ثانیه دایانیر. اندامی مانتوسونون اوستوندن گئیدی بی گئن مانتونو چیخاریب بوکدو کدن سونرا، کیفینه قویور. کیفینی سول چینیدن آسلا ییر.

دریندن نفس آلیر. هاوادا کی قوخو بورنونا دولور. اوزاقدان جوت باجینی، شیرنیاتچی نین قباغیندا گؤردو کده، آغزی آزوای^۱ دادیر.

هر آدیم باشی، ساغری سینا^۲ ییغیشان مانتوسونو آشاغی چکییر. باجی لاردان اؤتوب، شیرنیاتچی ایله دورمکچی نین^۳ آراسیندا کی دیوارا سؤیکه نیر.

^۱ بیتگی دن آلینمیش بیر نوع کیتره. صبر زرد ادلی بیتگی دن آلینمیش کیتره.

^۲ یاچاق. کفل.

^۳ ساندویچ مغازه سی.

خىبابان قارىشقا يوواسى دىر سانكى. يولدان اۋتونلرلە قىمىلداشیر. برقلە ایشلەین
ھاوا كۇرپونون پىللەلرى سس سىز آشاغى سورونور.

قىز، اۋز اورەيىندە كۇرپودن آشاغى سوروشن كىشىلرى سايیر. بىر، ايكى، اوچ...
آلتى، يىددى... اون بئش... ايبىرمى...

«بلکہ بىرى سوپروشوب آياغىمىن آلتىنا دوشدو» - دئىە دوشونور. گنج بىر
اوغلان، ائلە ناشىجاسىنا گۇز ائلە بىر كى، گۇزويلە قاشى تپەسىنە چىخیر.

قىز گولومسە بىر. اوغلان قىزىن اۋنوندىن كئچدىكە، دوداق لارىنى قونچالايب
ماچى دئىە اونا حوالە ائدیر. قىز اوزونو چئویرىب، شىرنىياتچى نىن رفلکس
شوشەسىنە باخیر.

شىرنىياتچى نىن ایشچىلرىندىن بىرى، بولوت دولو شىرنىنى ویتىرنە دوزور. قىز
گۇزونو اوندان آيىرمیر. ایشچى ساندىق دالىنداكى كىشى يە باخىب، شىشە
دالىندان ايكى قرايە اونا گۇستىریر. قىز گولومسە يرك باشىنى ترپەدىب، ویتىرنە
دال چئویریر.

باجىلار شىرنىياتچى نىن قاباغىندان خىبابانا آخىشىبلار. اونلار بىرى پىادا
يولويلا خىبابانى آيىران نردەلرە دايانىب، چرقدىندىن چىخان سارى تئللرىنى
بارماق لارىيلا اوخشايبیر. او بىرى ايسە خىباباندىن كئچن ماشىنلار سوزور.

آغ رنگلى پۇ، باجىلار اۋنوندىن دايانىب. ماشىن شوشەسى برقى پلە كىمى
آشاغى گلىب يارىدا دايانىب. باجىلاردان - سارى ساچلى باجى نىن تئللرى،
يارى آچىق پنجرە نىن شوشەسىنە تۇكولور.

جىلاز بىر اوغلان، قىزىن اۋنوندىن دايانىب اوزونە گولومسە بىر. قىز اونون
سارالمىش دىشلىرنە باخىب، اوزونو شىرنىياتچى دان چىخان اداملار چئویریر.

اوغان ايسە سومسونرک، بىر آز يوخارىدا، قادىن پالتارى ساتان بوتىكىن اۋنوندە داينىر. وپترىندەكى مانکن لره باخا-باخا گۆز آلتى قىزى سوزور.

شىرنىياتچى دان چىخان بىر كىشى، حىيات يولداشى ايله بىرلىكدە قىزىن اۋنوندن سوووشاندا، كىشى يولداشىندان يايىنىپ، گىزلى-گىزلى قىزا گۆز ائله يىپ گولومسەيىر. كىشى جىلاز اوغلانىن يانىندان اۋتركن، اوغلان اونا گۆزونو برلدىپ يئرە توپورور. كىشى ايسە بىر سۆز دئمەدن باشىنى آشاغى سالىر.

قىز ساعتىنە باخاركن، جىلاز اوغلان گلىب اۋنوندن اۋتوشوب شىرنىياتچى مغازەسىنە گىرىر. قىز، برقى پلەلردن آشاغى سوپروشن لره باخىر. بىر قادىنىن چارشابى پلەنىن دىش لرىنە ايليشىپ، باشىندان دوشور. قادىن ايسە تلەسىك چارشابى باشىنا چكىمكى اىستەدىكدە، چارشاب جىرلىر. قىز گولور.

اوغان، الدە پاكىت قىزىن اۋنوندە داينىپ، بارماق لارىيلا پولون مىقدارىنى گۆستىرىر «اوستەلىك شىرنى دە آلمىشام!» - دئىير. قىز آنجاق باشىنى ترپەدىر.

اوغان دىنر-دىنمىز برقى پلەنىن يوخارى قالخان طرفىنە گئدىر. باجى لارىن بىرى يئرەندە يوخدور. سارى ساچلى، بارماق لارىيلا تئل لرىنى اوخشايىر.

اوغان خىابانىن او بىرى اليندە اوست كئچىدىن دىرەيىنە داينىپ.

پلەنىن آياغىندا دوران جوت باجى نىن بىرى، قارا رنگلى زانتىنىن شوشەسىندن باشىنى اىچرى سوخوب، نىسە دانىشىر.

قىز، دورمكىچى دن ائشىيە چىخان ار-آروادلارا باخىر. دورمكىچى نىن شوشەسىندن، مىز آرخاسىنداكى ايكى گنج اوغلانى ماددىم-ماددىم سوزور.

بىرى باشىيلا قىزا «بويور» - دئىير.

قیز اوزونو خیابانا چئویریر. نردهلرین اؤنونده کیمسه یوخدور. خیابان بیر آز ساکتلهشیب. شیرنیاتچی مغازه سینده ایسه، تکجه ایشچی لردیر اویان-بویانا شوتویورلر.

قیز ساعتینه باخیب پله لره ساری گئدیر. جیلاز اوغلان دوردوغو یئرده گورونمور. برقی پله لر، قیزی آستا-آستا یوخاری قالدیریر. اوغلان پله لرین آشای سورونن طرفیندن قیزا باخیر.

بو يئمك ككره دادير

ايكى اللى بوينونو اوووشدوردو. قول لارينى آچيب گرنشديكده آلى، انى-بويو متر ياريم اولان قوطو بيچيملى اوتاغين ديوارلارينا ديدى. تايپ ائله ديبى يازى لاريندان پرينت آلب كامپيوتري راحتلهدى.

بارماق لارى سيزيم-سيزيم سيزيلداييردى. كاغذلاريني توپلاييب، ياتاق اوتاغينداكى ميزين اوستونه قويدو. «بيري چييين لريمى اوووشدورسايدى» - دئيه دوشوندو. آرى، قاباغيندا بير كاسا سيميشقا، گۆز لرينى تلويزيونا زيلله ميشدى. «دوروب دوش آلسام، بلكه يورقونلوعوم چيخار» - اؤز-اؤزونه دئدى.

دوشدان چيخيب، بير قتفه باشينا، بيرينى ده گۆوده سينه بورودو. قاپينى آچديقا، حمامين بخارى اوتاغا دولدو. گۆز لرينى اوووشدوردو. ائوين ايچينى چن بوروموشدو ائله بيل.

گوزگو قاباغيندا دايانيب، باشينداكى قتفهنى گۆتوردو. باشىنى ساغ-سولا تىرىپدندە، ساچلارنى نىن سويو گوزگويە داشلاندى. چىيىنىدەكى قتفهنى آچىپ اۆزۈنۈ قورولايىردى. ھىمىن حالدا اولسا دا، گۆزۈنۈ بىر آن گوزگودن يايىندىرەيدى. ياناغى آل قىرمىزى گۆز آلماسى ايدى سانكى. كىرىپىكلرى ھلە دە ياش ايدى. الينى بويون-بوغازينا، بىر دە دۇش لىرەنە چكىدى. نىچە آددىم دالى چكىلدى. بىر آز ساغا دۇنوب اۆزۈنە باخدى. بوي-بوخونونا گۆز گزىدىرىدى. سولا دۇندويۈندە، اوتاغىن قاپىسى چالىندى.

«شاما نە يىمىز وار؟» - اوغلو سوروشدو.

تلەسىك قتفەيە بوروندو «ايسپاناق بورانىسى» - دئدى.

«آه. بو دا اولدو يئمك؟» - اوغلو قاپىدان اوزاقلاشاراق دئدى.

ھاوا اىستى ايدى. ساماقچاسى نىن سال-كئچىردىنى بركىدندە، اورەينى بىر شى سىخدى. دكولتە دون گىيىب، يئنى دن گوزگودە اۆزۈنە باخدى. بىگودەلرى كمدون اىچىندن چىخارىپ قىورىم ساچلارنى بوردوقدا «بو ساچلاريم لا آفرىقادا ياشاياق ايدىم!» - دئىە اۆز-اۆزۈنە مىزىلداندى.

اوتاغىن قاپىسىنى آچدى. سشوارى برقه سالىب بىگودىلرە توتدو. اوتاغىن قاپىسى بىردن چىرىپىلدى؛ دىكسىنىب سشوارى سۇندوردو.

«فوتبالا باخىرىق. بو سشوارىن سسىن چىخارتماسان اولماز؟»

سشوارىن سىمىنى پىزدن چكىب گوزگودە گۆزلرەنە باخىب «اۆزۈنۈ كىنترل ائلە، سويوق قانلى اول» - دئىىب، گۆزلرەنە يوموب درىندن نفس آلدى.

اوتاقدان ائشىيە چىخىب آشپىرخانايا گئندە، كاغذلارى كاور اىچىنە بوراخدى.

«بىر آزدان گلىب بونو اپاراجاق لار. زنگ چالاندا سن اپارارسان» - تلۈيۈن

قاباغىندا اوزانان اوغلوندا دئىىب، كاورى سكى نىن اوستونە قويدو.

اوغلو تلویزیون کنترولونو الینده اوینادیردی. اری، داماغینداکی سیگارین توستونو بیغلارینین آلتیندان هاوایا اوفوروردو. بیر آن دایانیب، اونون تۆکدویو سیگار کولونو سیمیشقا قابیق لارینین اوستونه تماشا ائلهدی.

«تلویزیونون قاباغیندا دورما» - اری دئدی.

کاور ایچینده کی یازی لاری چیخاریب باشدان بیر ده اوخودو.

«یلک دفعه دیر بیرینین سفارشی یله مطلب یازیرام» - ارینه دئدی.

اری سیگارینین کۆتویونو سیمیشقا قابیق لارینین اوستونده سؤندوردو.

«آجیمدان اؤلدوم آخی. هله شام حاضر دئیل؟» - اوغلو دئدی.

بشقاب لاری تله سیک میز اوسته دوزنده، بیرسی الیندن یئر دوشدو. اورهی قیریلدی.

بشقاب پارام-پارچا اولدو. اوغلو تنه بیدن سسلندی:

«خانیم سیندیران قابین سسی چیخماز کی! ایندی بیز اولسایدیق...»

بشقایین سینیق لارینی سوپوروب زیبیل قابینا بوشالیدی. اوغلو یخچالی آچیب

ایچینه گۆز گزیدیدی.

ایسپاناق بورانیسینی، هره نین بشقابینا بیر پای چکیب میزین اوستونه قویدو.

اوغلو آیاق اوسته، یوغورتدان بیر قاشیق آغزینا قویوب، دئدی: «باری بیر

قایقاناقدان زاتدان پیشیرسئیدین. بو نه دی آخی؟!»

موبایلی زنگ چالیدی. تله سیک اوتاغا قاچاندا، آیاغینا بیر شئیین باتدیغینی حس

ائتدی. آخسایا-آخسایا اوتاقدان قاییدی، اوغلونا اوز توتدو: «سفارش صاحبی

گلیب یازینی آپارسین. یکی دقیقه دن سونرا آپارتمانین اؤنونده اولاجاق.»

اوغلو «گلیر، منیم ساغریما گلسین! بونون منه نه دخلی وار؟!» - دئییب یئمه یه

باشلادی.

«بالامسان! بير دقيقه چكمز، دور يازيني اونا چاتدير، سونرا گليب يئمهييني يئيرسن. ساچ لاريمدا بيگودي وار، يوخسا من اوزوم آپارارديم».

اوغلان اينده كي قاشيغي بشقابينا چيرپدي. بشقابين قيراغيندان بير پارچا قيريليب قادينين آياغي آلتينا دوشدو.

«... يئين ايتين، قاشيغي بئلينده اولار» - اوغلو دئييب، سكي اوستونده كي يازيني چنگه له دي. قاپي نين سسي قادينين قولاق لاريندا، باشيندا تاققيلدادی.

اری كاناپه ده اوزانيب تلویزیونون كاناليني ذيشيردي. او ايسه سس سيزجه ميز باشيندا اوتوروب، ايسپاناقدان بير قاشيق آغزينا قويدو. ايسپاناق ديل دوداغيني ييغدی.

«بير قايقاناق دا پيشيرسئيديم» - دئيه اوز-اوزونه دوشوندو.

قار ياغير

قادين، پنجره دن آپارتمانين قارشيسينداكى پاركا باخيب دوشونور. «گۆى قىزاريبها. قار ياغاجاق». كامپيوتر باشيندا اوتوران اوغلونا باخيب، دئيبير: «يورولمادين؟!» اوغلان باشينى مانيتوردان قالديريپ، هئچ بير سۆز ائشيتمه ميش كيمي دونوق باخيش لارلا اونون اوزونه باخير.

آناسى «گۆى قىزاريب، قار ياغاجاق» - دئينده، باجى لارييلا بيرليكدە پنجره نين قاباغينا قاچيب قارين ياغماسينى گۆزله يرديلر. قىزاران بولودلاردان قار ياغيب-ياغماميش، بويون-بوغازلارينا بير شال بورويوب، حيطه قاچيب، قارتوپو اوينايار، زويولداق اوچارديلار. قار آدمى دوزلديب، اونو اؤز كهنه پالتارلارييلا گئيپنديرديلر. بارماق لارى دونسا دا، وئچ لرينه آلمادان، قار آدمى دوزليپ باشا چاتمايىنجا ائوه دؤنمزديلر. بوتون قيش بويو، قار آدمى حيطين بير بوچاغيندان گؤزتچى كيمي اونلارين گليب-گئتمه سيني گودردى.

بیر دۆنه پالتارى نین ایکی دویمه سینی قوپاریپ اونلاری قار آدامینا گۆز کیمی یاراشدیراندا، آناسیدان اولمازین کۆتک یئمیشدی. گۆز یاشلاری یاناغیندا بوز باغلامیشدی. همن ایل، قار آدامی کور بیر گۆزتچی کیمی، حیطین بیر بوجاغیندا دونوب قالمیشدی!

پنجره نین قباغیندان اوزاقلایب، حیات یولداسی نین یانیندا اوتوردو. «قار یاغاجاق! گۆی یامان قیزاریب» - دئییر.

کیشی، الینده کی قزتی ائله دقتله اوخویور کی، یانیندا بیرین ایله شیب- ایلشمه دییینی باشا دوشمور؛ اوندا قالسین کی، سۆزلرینی ائشیتسین!

آباغا دورور. یئنه پنجره یه یاخین لاشیب بولودلارا باخیر. اری نین الینده کی قزتین خیشیلتیسی قولاق لارینی اینجیدیر. توز دسمالینی گۆتوروب، ائوین جانینا دوشور. شوشه میزلی بلور کیمی پاریلدا دیر. تلویزیونون توزونو آلیب شوشه سینده اؤز شکلینه باخیر.

شیشه تمیزله بیجینی یاتاق اوتاغیندا کی گوزگویه فیسیلدا دیر. دستمالی گوزگویه چکنده، بیر آن دایانیر. آغ چیچک کیمی گوزگویه یاغان قار دنه لری، ماوی شوشه تمیزله یین له بیر-بیرینه قاریشیر؛ سانکی آلاچرپوودور، قوپوب. دستمالی یئرہ آتیب، سئوینجله دئییر: «قار! اؤزو ده گۆر نئجه یاغیر!»

بیر ساعت، بلکه ده چوخ، پنجره نین اؤنوندن ترپنمه دن، آپارتمان قارشیسیندا کی پارکا گۆز تیکیب. قار دایانمادان یاغیر. اوشاق لارین بیر نئچه سی، قاری اوووج لاریندا یومرولادیب بیر-بیری نین اوز-گۆزونه چیرپیلار. بیر-ایکی سی ده زیولداق اوچور.

تنه بی ده اوبان-بوپانا گئدیر. حیات یولداسی نین اؤنونه سریلن قزتی آیاقلاییر. قزت خیشیلدا ییر. یولداسی باشینی قالدیریب؛ آیاق لارینا بئله باخمیر.

بئىنىندە بىر فېمىلىدايىر، آنجاق اۋز ياشىنى، بىر دە دن دوشموش ساچلارنى دوشونور. گوزگويە باخىب، آغارمىش ساچلارنى ال چكىر. گۈزلرئنه گولور. اختىارسىز حركتە گلير. پالتار ايشقافىنا سارى گئدىر. گئىنىر. الجكلرنى گۈتورور. بويون-بوغازىنا قالىن بىر شال بورويور.

اۋون چىخاندا حىيات يولداشى نىن «ھارا گئدىرسن؟» - سۋالىنا جواب وئرمەدن، قاپىنى اۋرتور.

الجكلرنى گئىه-گئىه پاركدكى اوشاقلارنى گولوشونە قوشولور. بىر-ايكى قار توپو اوزونە، باشىنا دىير. اوووجلارنى قارلا دولدوروب، اوشاقلارا سارى قاپىر. آپارتمانين پنجره لرئنه باخدىقدا، حىيات يولداشىيلا اوغلو، بىر دە پنجره آرخاسىندان باخان قونشولار، جانسىز بىر ھىكل كىمى گۈرونورلر.

آدرس

چانتا دولو کتاب لاری، کیچیک چمدانی ایله بیرلیکده سوروتله یه-سوروتله یه قاپی نین آغزینا قویوب کردی قیراغیندا دایاندی. دیوار دیبینده کی ساری رز چیچه ییندن آنجاق سولموش بیر بوتاقالمیشدی. نانه-ریحان اییسی بورنونا دولدو. الینی کردی نین سکی لری بویونجا اوجالان نانه لره اوزالتدی. ایکی تئل قوپاریب، توزونو بارماق لارییلا سیلیدیکن سونرا آغزینا قویدو. عطرلی نانه نین دادی دیلینده یاییلیب بوغازینی یاندیردی.

اوتاقدا تلفن زنگی چالیندی. زنگ سسینی وئجینه آلمادان یئرہ تۆکولموش سولغون هئیاو یارپاق لارینی یواش-یواش سوپوروب بیر بوجاغا ییغدی. سوپورگه-نی کردی نین قیراغینا بوراخیب قالخاندا، بئلیندن آغیر سانجی توتدو. هر آخشام کی کیمی، هئیاو آغاجی نین آلتینداکی چارپایی دا اوتوردو. بو گون آنجاق

ههچ بیر کتاب اوخوما یا جاقدی. آخشام لار بیر ایکی ساعت آغاجین آلتیندا اوخویوب یازیردی.

پاییز، اونون حیطینده هئیوا قوخوسو وئردی. اوشاقلیقدا هئیوا یا آغزی سولاناردی. مدرسه ده ناظمین گؤزوندن ایراق، قاپی لارین چرچیوه سینده ازدییی هئیوا لارین دادی هله ده داماغیندایدی. اوتوردوغو یغردن حیطین هر یئرینه گؤز گزدیردی. گؤز لری بیر آز سولاندی. قالخیب اوتاغا گئتمک ایسته دییینده یئنه الینی بئلینه آپاردی.

پیلله لری یوخاری چیخمامیش، قایدیب ایکی یئتگین گولؤیشه^۱ هئیوا دردی. هئیوا لارین ایکیسینی ده چانتاسیندا، پالتار لاری نین آراسیندا یئرلشدیردی. پیلله لری چیخارکن دیزاویناق لاری نین شیققیلتیسسی، سور و تمه لری نین تیققیلتیسینا قاریشدی. ایواندا بارما قلیغا^۲ سؤیکه نیب بیر ده کردی یه گؤز گزدیردی.

یاتاق اوتاغیندا، بالینجینی قوجا قلابیب پنجره یه دونوخدو. قارشیدا کی آینادا، بئلی بوکولوو بیر هیکل کیمی گؤرونوردو. تلفن یئنه زنگ چالیدی. بالینجی یورقانین آلتیندا یئرلشدیریپ، یورقانین قیریشیق لارینی دوزلتدی. ایشقافین قاپیسینی آچیب، بیر-بیری نین اوستونه دوزولموش بو قچالارا باخاندا، تلفنون زنگی کسیدلی. بو قچالارین بیرینی آچیب، ایچینده کی تیهه دیمه میش^۳ قوماش-لاری چیخارتدی. قوماش لارین قاتیندان بیر قالب صابون یئر دوشدو. صابونو بورنون توتوب دریندن قوخلادی. صابونون اوز قابیغیندا کی ساری ساچلی قیز،

^۱ تورشا-شیرین میوه و سایر.

^۲ نرده.

^۳ تیکلمه میش پارچا. بیچلمه میش پارچا.

اوزونه گولوردو. بوچپادان تیرمه بیر دستمال گۆتوروب، قالانینی یئنه بوچچایا یئرلشدیریپ باغلینی دویونلهدی.

ایشقافی باغلیارکن قاپینین جیریلتی سسی اورهیینی داریخدیردی. «یادیمدا اولسون انجامه‌نی^۱ یاغلايیم» - دئدی. ارینین شکیلینی میز اوستوندن گۆتوروب، الینی شکل قابینین شیشه‌سینه چکدی. ندنسه شیشه یئنه توزلو گۆرونوردو. چرچیوه‌نین دالینداکی نازیک تاختا واراغی ائشیه چکدیکده، شکل یئرله دوشدو. شیشه دالینداکی توزو اوله‌دی. شکیلی یئنی دن یئرینه قایتاریپ، تیرمه دستمالین ایچینه بوکوب اونو میزین چکمه‌جه‌سینه قویبدو.

اوتاغین قاپیسینی باغلايیب مطبخه گئتدی. پنجره‌دن گاز اوجاغی‌نین اوستونه دوشن ایشیق، گۆزلرینی قاماشدیردی. یخچالی برقدن آیریپ راحتله‌دی. بوش یخچالین ایچینی بیر ده یوخلادی. قاب یئرینده‌کی استکانی دولابین ایچینه قویمازدان اول، شیر سویو ایله دولدوروب ایچدی.

مطبخده اوتوراجاق اوزرینده اوتوروب میزه دیرسکلندی. تنه‌بی دن اوشاق لارین اوجالان‌های-کویو قولاق لارینا دولوردو. تلفنون زنگی اونو اوشاق لارین‌های-کویوندن اوزاقلاتدی.

تنه‌بی‌به کئچدی. تلویزیونون یانینداکی شکل قابینی گۆتوروب باخدی. شکل ده ایکی یئنی‌یتمه اوغلان گولوردو. «قایتارماغیما گلسه‌لر ده، سؤزومدن دؤنمه‌یه‌جم» - دئییه اؤز ایچینده دوشوندو. شکل قابینی یئرینه قویوب آستا آددیم‌لارلا آینانین قاباغیندان سوووشاندا، بیر آن دایانسا بئله، اؤزونه باخمادی آنجاق.

^۱ لولا.

مانتوسونو گئیب چرقدینی باشینا سالدی. تلفن دسته‌یینی قالدیریب، بیر آز دایانیب، سونرا نمره‌نی ییغماغا باشلادی.

«بیر ماشین ایسته‌ییرم» - دئدی، «فوجالار ائوینه!»

دسته‌یی آستاجا یئرینه قویدو. تلفن بیر ده زنگ چالدی. سیمی پریزدن چکیب آیاغا دوردو. چانتاسینی قولوندا سالیب اوتاقدا ان ایوانا چیخدی. بئلی سیزیم-سیزیم سیزیلدا ییردی. نئچه دقیقه دایانیب حیطه باخدی. کوچه قاپیسینی آچیب ائشیه چیخدی. دیواردان کوچه‌نین پادا یولونا تۆکولن هئووا یارپاق لاری، یولدا ان اؤتن لرین آیاق لاری آلتیندا خیش-خیش خیشیلدا ییردی.

قادینین ساچ لاری ساری رنگلی چرقدی نین آلتیندا گوموشو رنگه چالیردی.

قالا

الينده شاهمات، يئرده ايسه اوچ نسلدن قالميش عنتيقه بشقابين سينيق لارى. «چولاق سان؟! يوخسا باشينا هاوا گليب؟» - بيري بئنينده سسلندى. دؤنوب ديوارداكى شكيله باخدى. شكيله كى كيشى حرص له دوداق لارينى بير-بيرينه سيخميشدى.

قادين، اياق لارى نين آلتينداكى سينيق ساخسى لارا باخدى. بشقابين اوزرينده كى قيرمىزى چيچكلر، ساپلاق لاريندان آيريلميش، رنگلى سولموشدو. قوش-لارين-ديمديكلرى سينيب، گؤوده لرندن آيرى دوشموشدو. ايندييه قدر ديمديكى سينيق قوش گؤرمه ميشدى.

اياق لارى نين آلتينا باخا-باخا، ساخسى قيريق لاريندان اوزاقلاشدى. الينده كى شاهمات قوطوسونو ميزين اوستونده آچيب، آغ مهره لرى اؤزو اوچون دوزدو. قارا

مهره لری دوزمه دن، دیوارداکی کیشی نین شکیلینه باخیب، «بو دفعه، سن قارا مهره لرله اوینا» - دئدی.

قارا مهره لری، آغ مهره لرله قارشی-قارشیییا دوزدو. سونرا، آلی بیر-ایکی آغ پیادایا توخوندو. پیادالار یئره دوشدو.

«الی نین توتومو قالماییب ها هئچ». شکیلده کی کیشی نین دوداغیندا آجی گولوش واریدی. قادین، دیوارداکی شکيله باخا-باخا یئریندن قالخدی: «بیر آز ال ساخلا چایی دمله ییم!» کیشی گؤزونو قارا مهره لرله زبلله میشدی.

قادین، الینده کی چای استکان لاری نین، بیرینی آغ مهره لرین یانینا، او بیریسینی ایسه قارشی طرفده قارا مهره لرین کنارینا قویدو.

دیوارداکی شکيله باخیب «بو دفعه من باشلا یا جاغام» - دئدی.

پیادالارین بیرینی قارا پیادالارا ساری سوروتله یرکن، گؤز آلتی کیشی یه باخدی. کیشی بیر آز دایانیب، ساغدان ایکینجی پیادایا اشاره ائله دی. قادین قارا پیادایا

ایکی خانای ایره لی یئری تئدی. سونرا دایانیب فکره جومدو. گولومسه یرک پیادالاری نین بیرینی ایره لی سوروتله ینده، یواشجا کیشی یه باخدی. کیشی نین

قاش لاری آلتی نین اورتاسیندا دو یونلندی. قادین بیر ده گولومسه دی. کیشی ایسه هیمله اورتاداکی پیادانی گؤسترده، قاش لاری لاپ تپه سینه چیخدی.

قادین ساغ الینی چنه سینه سؤیکه ییب فکره جومدو. بیر الی چنه ده ایکن، او بیر الی ایله فالاسینی تری تئدی. کیشی، دینمز حالدا شاه مات فیقورلارینی

سوزوردو. قاش اشارتی ایله آتی نین حرکت ائتدیریلمه سینی ایسته دی. آغ پیادا ییخیلاندان، قادین قانی قاچدی؛ عصبی حالدا آلتی نین قیریش لارینی

اوووشدوردو. کیشی گولومسه دی. قادین فیلی اویناتدی. کیشی بوتون مهره لری پوسراق، قالالارین بیرینه گؤز یاتیرتدی. قادین الینی قارشی طرفده کی قالایا

اوزاتديسا، آنجاق اونو ترپتمه‌دى. كيشى، آلننى قيريشديريب حرص له قادينا باخدى. قادين كۆكس اۋتوروب چيىنين يوخارى قالدېردى. كيشى كوسگون حالدا اۋنونده كى ديوارا زىللىندى.

«چايىن بوزا دۇندو. سن ايستى-ايستى ايچرسن، دئيرسن ديشيم؟ هه؟»

كيشى ايسه چرچيوه دن اۋنونده كى ديوارى سوزوردو.

قادين، قندى چايا باتىردى. قند ارييب بارماق لارى نين آراسىندا استكانين ديبينه سوزدو. كيشى ساللاق ساللادى. گۆز اوجو قادينا باخىردى. قادين ايسه تزه دن بير ديش قند گۆتوروب، چايا باتىريب آغزينا قويدو. مەرهلرى سئزه-سئزه، چايى قانتاردى. سونرا يئرئندن ديك قالخىب، كيشى نين سويوموش چايىنى گۆتوروب مطبخه گئتدى. الينده سوپورگه-خاك انداز گئرى دۇندو. بشقابين سىنيق لارنى سوپورمزدن اول بير ده كيشى يه باخدى. كيشى، دىنمز-سۇيله مز قادينين الينده كى سوپورگه-خاك اندازا باخىردى. قادين، ساخسى قىرىق لارنى پلاستىكه تۆكوب پار-پالتارنى گئىندى. گوزگويه باخا-باخا يايلىغىنى باشينا سالدى، زيبىلى گۆتوروب ائودن چىخدى. كيشى، چرچيوه نين دۇرد بوجاغىندان پنجره يه بويلاندى.

قادين، الده زيبىل پلاستىكى كوچه باشينا چاتار-چاتماز گئرى دۇنوب، بينانين ايكىنجى قاتىندا كى پنجره يه باخدى. بير آن كيشىنى چرچيوه دن بويلانيب اونا باخدىغىنى حسّ اندىب دىسكىندى. زيبىلى كوچه باشىندا كى قبا آتاند، ساخسى سىنيق لارى شاققىلدادى.

دندسه ساخسی لارین شاققیلتی سسی اورهیینی داریخدی. ائوه قاییتماق ایسته‌دی. آددیم آتامیش یئرینده دابانیب بیرآز دوشوندو. کوچه باشیندان بیر داها ائوی نین پنجره‌سینه باخدی. آستا-آستا محلّه‌ده کی پارکا ساری آددیملا‌دی. پارک، اونونلا یاشید اولان قوجا کیشی لرله دولویدو. کیشی لردن بیر-ایکیسی شلوارلارینی دیزلرینه قدر چیرماییب، بوزوشموش دری لرینی گونه وئرمیشدیلر. بیر طرفده ایسه نچه کیشی دئییب-گولوردولر. پارکدا داشدان قوراشدیریلیمیش میز لرین اوزر رینده شاهمات صفحه‌سی ناخیشلانمیشدی.

صندل لرین بیرینده اوتوروب شاهمات صفحه‌سینه باخدی. « کئشگه مهره لریمی گتیره‌دیم» - دئییه دوشوندو.

قارشى میزده قارابوغدایی، چال ساچلی بیر کیشی شاهمات صفحه‌سینه باخراق فکره دالمیشدی. قادین گؤز آلتی اونون مهره لرینه، بیر ده کیریمیش ال لرینه باخدی. قارا مهره‌لر، کیشی نین طرفینده ایدی. آغ مهره‌لی طرفده کی صندل ایسه بوش ایدی.

قادین اطرافى سوزدو. باخیشی نین گؤروننتوسونده، شاهمات صفحه‌سیندن بیر آز آرالیدا، زویولداق گئدیپ سویروسن اوشاق لاری سئیر ائتدی. اوشاق لار اونون گؤزونده، گوندن-گونه بؤیویوردولر. قادین، اوشاق لاردان اوز چئویریپ میزین اوزرینده کی شاهماتین آغ مهره لرینه باخراق یئریندن قالخدی...

سارى كۆيىنك

ياغىش، شىدىرغى ياغىردى. نودان لارىن كۆپوكلنمىش سويو، دۇشمەنن چالا-
چوخورونا دولوردو. لاخلامىش كرپىچلر، يولدان اۋتنلرین آياغى آلتىندا
شاپپىلدايدى. آرخين سويويلا بىرلىكدە خىابانىن اورتاسىنا سوروشن زىر-
زىبىل، ماشىنلارین تکرلى آلتدا او يان-بو يانا آتلىردى.
قادىن خىابانىن قىراغىندا دايانىب، يولدان اۋتن تاكسىلرە گئدەجەيى عنوانى
دئىير. شوتوين ماشىنلار، خىابانىن كىرلى سويونو ايسلانمىش پالتارلارينا
سىچرادىر. ياش باشماق لارى، آياق لارينا آغىرلىق ائدىر.
نچە آددىم ايرەلى لەيىر. ھردن-ھردن گئرى دۇنوب آرخايا باخىر. گاھدان دا
آيىلىب، يانىدان سوووشان ماشىنلارا گئدەجەيى عنوانى دئىير. وار گوجويلە، آغ
رنگلى بىر پىكانا باغىرير: «مىن تومن ... خىابانى».

پىكان اوندان اۋتوشوب بىراز آرالى دا داينىر. شوفر، دالى دنده ايله قادىنا سارى قايدىب، قاباغىندا داينىر. قادين آرخا قاپىنى آچىپ اوتورور. ايسلاق پالتارلارى جانىنى اوشودور. سىسلەنىب بوغلانان گۆز لويونو، گۆزوندن آيىرمدان يايلىغى ايله سىلمك اىستىركن، گۆزو، شوفرىن كۆينەينە ساتاشىر. ايسلاق وجودو، تپەدن آياق لارىنا قدر گىزىلدەيىر. ماشىنىن تىرلىمىش شوشەسىندىن ائىشىيە باخىر. ھىچ نە گۆرونمور. بىر دفعە دە گۆز آلتى سوروجونون كۆينەينە باخىر. اونون آتقويروغو ساچ لارى، جانى نىن گىزىلتىسىنى ايسىتمەيە، تىترەيشە چئويىر.

يواشجا قاپى يا سارى سوروشور. يىنگى ايله شوشەنى سىلىب، قاپى نىن قىفلىنا باخىر. ندىسە غىرەادى بىر شى آختارىر.

شوفر گۆز گودن قادينى سوزرك، آستا-آستا شوشەنى آشاغى ائىدىرير.

ماشىنىن شوشەسىلن لرى داينامدان حرىكتەدىرلر. ساغا گىدىب، سولا قايدىرلار. گىدىرلر، قايدىرلار. قادين اۋز خىالىندا، شوشەسىلن لرىن سارقاق وارى حرىكى ايله بىرلىكدە آتاسى نىن توكانىنا گىدىب قايدىر؛ گىدىب قايدىر...

آتاسى، توكان لا ائوين آراسىنداكى كىچىك قاپى دان ائوہ گىرر-گىرمر، بىر دە قايدىب «يارىم ساعته گلىرم. بىر تىكە ناھار يىيىم گلىم. شولوخلوق ائلەمەھا. چوخ دا ھلە-ھولە يىمە، ھاوا اىستىدى، ناخوشلارسان...».

قادينىن گۆز لرى شار كىمى، شوشەسىلن لرىن حرىكى ايله ساغ-سولا دولانىر

«الىمى اوزايدىب اونلارى دايندىرا بىلسەيدىم...» - دئە دوشونور.

شوفر، گۆز گودە گۆز آلتى قادىنا باخاراق، داشبوردداكى كاستلرى اللشدىرير.

قادين ايسە اۋزونو گۆرمەمەزلىيە وورور.

ياغىش دامجى لارى موسىقى ايله شوشەلرە توخونور. دامجى لار شوشەيە توخوندوقدا گىردە ايز بوراخىر؛ قادينى اىچىنە چكىر. دامجى لاردان يارانان

يوورالاق حلقلەر يوخ اولدوقدا باشقا حقلەر شوشەنىن اوزرىندە يوورانير. ياغيشىن دامجىلارى اوخ ديميش سىرچەلر كىمى ماشىنىن شوشەسىنە چىرىپلير.

موسىقى سسى آنسىزىن اوجالير. قادىن دىكسىنىب باشىنى قالديراندا، گوزگودە شوفر ايله گۆز-گۆزە گلير. باخىشىنى يايىندىرىب، كىفىنى قوردالايير.

ماشىنىن شوشەسىلنلرى داىنامدان گىدىرلر، قايىدىرلار؛ گىدىرلر، قايىدىرلار...
«سا سا سارى كۆيىنك گىمىشىدى!» - آغلايا-آغلايا آتاسىنا دىمىشىدى. آتاسى تر كۆيىنكىلى آرا قايىدان توكانا قاچمىشىدى. او ايسە الى ايله كوچەنى گۆستىرىب، بىر باشا تۆشەيىن آلمادان باغىرمىشىدى.

«سارى كۆيىنك گىمىشىدى... سا... سا... سارى...»

آتاسى آياق يالين كوچەبە قاچمىشىدى.

«بوغوردو منى... بوغوردو...» - دئىە-دئىە، آناسى نىن قوجاغىنا جوموشدو. قولاق لارىنا سىرغا ائىدىيى گىلەنارلار ازىلىب، سويو گۆز ياش لارىنا قارىشىمىشىدى.
«سا سا سا سارى كۆيىنك... بوغوردو... الينى ديشلەدىم... قىشقىردىم...»

«باغىشلايىن خانىم! اتوبانا دۆنمەلىيىم. خىابانلارى سو آلىب. كىچمك ممكىن دئىيل.»

«اتوباندان گىتمەيىن» - دىمك ايستەيىنجه، شوفر آرتىق اتوباندا ايدى.

ماشىنىن شوشەسىلنلرى داىنامدان گىدىب قايىدىرلار. اتوبان چوخ ساكت گۆرونور. شوشەسىلنلر دورمادان گىدىر، قايىدىر... گىدىر، قايىدىر...

ناهار اوستو هر يئر ساكت ايدى. گونش، توكانىن شوشەسى بويونجا اىچرى اوزانمىشىدى. او ايسە ھۇرۇكلو ساچلارلا، پىشخانين آرخاسىندا قولاق لارىنا گىلە-نار سىرغالاير. لاواشانى ايسە آغزىندا شاپھاشاپ شاپپىلدايدىدى. اوچ جوان

اوغان بىردىن-بىرە توكانا گىرىشىدىلەر. ندىنسىمەن ئاغزىمدا قىچىپ، لاۋاشا
ئىندە قورۇپ قالمىشىدى. اوغانلار گولوشموشدولر. «بىزە اوچ كانادا وئرا!» -
سارى كۆيىنكى دىمىشىدى.

ھىمىشە سوپودوچونون قاپسىنىننى آچاركن، قاپىيا باغانمىش قاپاق آچان
سوپودوچونون قاپسىنىننى توخونوب جىنگىلدەيدى. بو جىنگىلتى، اونون يامان
خوشونا گلدى. بىر كانادا گۆتورر-گۆتورمز، آرخاسىنداكى كۆلگەنىنى حسن
ئىتمىشىدى...

ماشىن ترمز ئىلەيىب دايدى. اورەيى گۆپھاگۆپ قولاق لارىندا سىلىندى.
شوفرىن كۆيىنەيىنە دىيىل، گوزگوبە باخدى.

«ئىلەيىل پىنچر اولدوا!» - شوفر گۆزگوبە باخراق دىيىپ قاپىنىنى آچدى.

شوشەنىن اوزرىنە چىرىپىنان ياغىش دامجى لارى شالاخو رىنگىنە دم توتان قوشا
ناغارادىر سانكى. اوتوباندان تىكە-توك سوووشان ماشىنلار، اوولدايا-اوولدايا
اوزاقلاشىرلار.

شوفر ماشىنىن قاپاق تىكرلىرىنە باخىر. قادىن ايسە اونون اللىرىنىننى اسمەدىيىنى
حسن ئىدىر. سارى كۆيىنكى شوفر، سول تىكرى يوخلايىپ، آرخايا - قادىن اوتوران
طرفە دۆنور. قادىن ايسە اوزونو دۆندىرمەدىن، اۋوندىكى شوشەنىن اوزرىندە
يووارلانان دامجى لارا باخىر.

ئىندە كانادا گىرى دۆندە، آرخاسىنداكى كۆلگە، اىنى اونون آغزىنا باسىپ
قوجاقلامىشىدى. او ايسە ال-آياق چالىپ چابالامىشىدى. چىغىرماق اىستەمىشىدى.
سارى كۆيىنكى آدم قورشاغىنىنى آچماغا چالىشمىشىدى. قىزىن گۆزلىرى كۆلەسىنە
چىخىمىشىدى. ئىندەكى كانادانى اونا تولازلامىشىدى. كانادا شوشەسى شاقىلتىيلا

توكانىن اورتاسىندا سىنمىشىدى. وار گوجو ايله اوغلانىن الىنى دىشلەمىشىدى...
قىشقىرمىشىدى...
شوفر، قادينىن اوتوردوغو طرفە ياخىنلاشاند، قادين قاپىيا سيغىشىب، دستەيى
برك-برك توتدو. ھۈلەسك قاپىنى قىفيللادى. بدنى بوز كسمىشىدى سانكى.
اۋنوندەكى شوشەيە باخاراق، شوفرىن حرکاتىنى ايزلەيىردى. شوفر، نىچە دفعە
آياغىنى تکرە چىرىپىب، دئىينە-دئىينە ماشىنىن آرخا ساندىغىنا يۇنلدى.
قادين، باشىنى اوتوراجاغا سۈيکەيىب گۈزلىرىنى يومدو. ماشىنىن شوشەسىلن لرى
دايانمادان گئدىب، قايىدىردىلار. شوفرىن سارى كۈينەيى جىم جىلاق سويويدو،
ايسلانمىشىدى...

منىم نه وقتىمدى!

ياتاغىمدا اوزانمىشام. گۆزلىرىمى يومورام. ھىچ اينانمىرام... ائله دوغرودان من باخا-باخا گلىب گۆزۈمە گىرەجك! جانىمى بورويەجك؟ ھلە ھىچ نە اولمامىش ال-قولوم سوستالدى. كىرىخىبلار. يقىن كىرىخىبلار. منىم نەيىمدى كى؟ ساچلارىما ھلە بىر ڧىن دە دوشمەيىب. چوخ تىزدى. منە ياراشمىر كى. قارى-قوجانى بوشلايىب، گلىب منىم ياخامدان توتاجاق؟ قاينانامى، خالامى، قوھوم-قونشونون قوجا قارىلارنى گۆرمز اولوب، گلەجك منىم بوينومدان آسلانسىن؟ خالامىن ساچلارىندا اوچجوت-بىر تىك قارا توك تاپىلماز. باش-گۆزۈ تىترەسە دە، ياسدىغىنا سۆيكەنىب ھلە دە حكىم اندىر. خالام ھمىشە دئىرھا «آتان خىخ دئىيب؛ سن اونون بورنوندان دوشوبسن». بونو اۋزوم دە بىلىرم. قرار

دئیل کی آتامین هر نه یی منه میراث قالسین. قاش-گۆزو، آغزی-بورونو منه قالب، یئتر. مگر آتامین مندن باشقا اورتاجی^۱ یوخذو؟

بیلیرم کیریخیبلار. گونده یوز دفعه حسنی حسین، حسینی حسن یازیرلار. منیم هئج بیر زادیم دئیل. آنجاق اوره ییمین باشیندا بیلیرم نسه بیر شی ییغیشیب قالب. حتماً ام-ار-آی اولدوقدا آدیمی باشقاسیلا دیشیک سالیبلار. رقیه، روحیه، روفیه، حوریه... ائله هامیسی بیر-بیرینه اوخشاییر. حکیم لرین فالچی یازیسینا بنزر ایلان-قورباغا خطینی اوخوماق بیر او قدر ده راحت دئیل. یقین کیریخیبلار.

هر نه اولدو، هشرخان اتینی یئیندن بری اولدو! معدمه مین بئله بیر یئمک لره وردیشی یوخذو. بلکه ده قونشوموزون بویلو گلینی اوموش، اوندان یانا منی قادا توموش!

وئردیییم ژورنال لاری گتیرمیشدی. نه قدر دئدیم ایچری گلمه دی. بیر ساعت قاپی دا دوروب، باجی-باجین اؤلسون دانیشدی. ایچری گلسه یدی، بیر بلله ده اونا توتاردیم، اوممازدی. ها ایسته دیم ائولرینه بیر پای گؤندریم، سونرا دئدیم قوی اوشاق لار یئسین. مگر عمرده نچه دفعه هشرخان یئیریک؟ یئنه تویوق اولسایدی، بیر پای گؤنده رردیم. نسه بیرین تیکه مده گؤزو وارمیش کی، یئیرکن بوغازیمی سؤکه-سؤکه آشاعی ائندی. اریم دئدی: «هشرخانین سومویو برک اولار، یقین بوغازیندا سوموک قالب». نه قدر کوره ییمین اورتاسیندان چالدی، سو ایچدیم، اوره ییمین باشیندان ترپشمه دی. هر نه دی، ایچریده قایناشیر. سانکی قیرتلاغیمی^۲ ایلان چالیر.

^۱ وارث.

^۲ اودلاق. حلقوم.

بلکه حکیم دوز دئییر. اما من آنامین بئشینجی قیزی یام. انصاف دئیل کی مندن قاباکی لار، مندن بؤوک لر قالسین، من گئدیم. هله اونلاردان قاباق آنام وار. سیراوارای اولورسا، منیم نوبه مه نئچه نفر قالیر. اما آتام قارداش لاری نین لاپ خیرداسی ایدی. اونلارین ایچینده یئرلری ترس دوشدو. بیلیمردیم آتام ناخوشدو. ایلک مکتبین بیرینجی صینیفینده ایدیم. اوچونجو زنگ ده تغذیه گتیردیلر. ایکی آداما بیر شوشه سود، بیر بسته بیسکویت. همیشه سودو قونشوموزون قیزی آذر ایله بؤلردیک. بیریمیز لیواندا، بیریمیز ایسه شوشه ده. سودو بؤلمزدن اول، آذر بارماغینی سالیب، شوشه نین ایچینده کی خامانی چیخاریب یالایاردی. سونرا پایینی لیوانینا تۆکردی. توتوشدوراردیق. اونون لیوانی بؤوک ایدی. همیشه مندن چوخ ایچردی. منیم لیوانیم، پرچم رنگلی بوکولن لیوان ایدی. سود تۆکسه یدم ساخلامازدی. ائله اونا گۆره ده شوشه ده ایچمه یی سئوردیم.

بیر گون آذر دئدی: «اجازه خانیم؟! بویوندن منیم سودومو، رقیه ایله بیر یئرده وئرمه یین».

معلم دئدی: «دالاشمیسیز؟ اولماز. ایکی گون سونرا باریشاندا دئیجه کسن اجازه خانیم، منیم سودومو رقیه ایله بیر یئرده وئر. بیز قونشویوق». اوشاق لار گولدو. آذر دئدی: «اجازه خانیم؟! آنام دئییب رقیه دن بیر شئی آلیب یئمه، آتاسی نین سرطانی وار».

معلم - سود سوشه سی الینده، کلاسین آراسیندا دونوخوب، داش هیکلہ دؤندو. او گون نه سود ایچدیم، نه بیسکویت یئدیم. آنام «کیم دئییر سرطان دی؟ حکیم لرین باشی چیخمیر» - دئییب، الینده کی توکو یولونموش تویوغو پارچا- پارچا بؤلدو. «اوره یینه تیکه دوشوب، دوزه له جک» - دئدی.

صباحدان هر گون آذره یاندی-قیندی وئردیم. بویون تویوق-پیلوو یئدیک - دئدیم. صباح تویوق پیتی سی، بیرسی گون قیزارمیش یئرالمابلا تویوق. آذرین آتاسی ایکی گوندن بیر بئچه لری کسیردی. آنام ایسه بیشیریب، سویونو قاشیق-قاشیق آتاما ایچیریردی. بئچه نین اتینی بیز یئیردیک. شیله-شوربا یئمکدن جانیمیز قورتولموشدو. بیر آی کئچمدی آذر دئدی: «اجازه خانیم؟! منیم سودومو رقیه ایله بیر یئرده وئر». سونرا آییلیب قولاغیما دئدی: «ائله بیل منیم ده آتام سرطان توتوب؛ دونن بیز ده تویوق-پیلوو یئدیک!»

اگر حکیم کیریمایبسا، اوره ییمین باشینداکی بو تیکه آتامدان منه میراث قالسا، کیم منه یئتیشر؟

گۆزه سن دوغرودان ائله یورقان-دۆشه یه دوشه جهیم؟ ۶-۵ آی یاشایاجام؟ اوشاق لار... کیم بیشیریب دوشوره جک؟ نه قدر ده فریزی دولدورسام... یووو... هئچ گۆر منیم فکریمه دیلر؟! بیلیرمدا!؛ مدرسه یه، دانشگاه گئندنه بیر جوت تمیز جوراب تاپا بیلیمه جکلر. درس لری؟.. کیم اثرته دن اونلاری یوخودان آییلدا جاق؟.. داش کیمی یاتیرلار؛ بیر ساعت ده زنگ چالسا، آییلمازلار کی؛ آتالارینا چکیبلر. من اولماسام، یقین او دا ایشینه گنجیکه جک!

اینانمیرام!.. ائله بو راحتلیقدا باخا-باخا اوله جهیم؟ اریم؟ ائولنه جک؟.. منیم یاتاغیمدا سئویشه جکلر؟.. گلن قادین من دولاندیغیم یئرلرده دولانا جاق؟.. آباق لارین منیم آباق لاریمین ایزینه قویاجاق؟ پالتارین منیم کمدوما آساجاق؟.. پالتارلاریمی کیمه وئره جکلر؟.. تازا آلدیغیم پالتارلار نئجه؟.. هئچ اینیمه گئیمه میشم کی... هله آنامین مکه دن گتیردییی شویلو پارچالاری تیکدیرمه میشم کی... بیر آی دئیل تازا پالتومو آلدیغیم! کیمه نه ائله میشم کی، آلدیق لاریم اؤزومه قسمت اولمور؟ اینانمیرام ائله بئله راحت-راحت اولوب گئدم.

نه زحمتله دیشینن، دیرناغینان ائو ییغمیشام؛ انصاف دئییل کی، تانیمادیغیم بیرسی گلیب منیم ائویمه ییبه دورسون. اولماسا گئدیم اداره ده عمر بیمهسی نین کاغذینی تزهلییم. بیمه نی اوشاق لارین آدینا یازدیریم. کاغذی یازاندا دوستوم دئدیها: «کیشی نین سونکو آروادینا مال ییغیرسان؟!» بلکه ده اریم ائولنسه، منیم عمر بیمه مین پولویلا تازا ائولندیی آروادا قیزیل-بزک آلدی؟ یووو... آمازا! من تانیدیغیم کیشی یوز آرواد آلسا بئله، بو ایش لری آنلاماز. او بلمز کی، آروادین بویون-قولاغینا قیزیل آلالار. دئییرلر: ایکینجی آرواد شیرین اولار؛ بلکه ده اونا آلدی. یووو... آمازا! بیلیرم آماز. بیمه کاغذینی دیشمه یه جه یم. قوی ائله من اؤلندن سونرا اوچ یئره بؤلونسون، هره سینه بیر پای.

گور نه دانیشیرام! ائله بیل کی دوغرودان دا اؤله جه یم! اما اگر اؤلسم، منیم میراثیم نئجه اولاجاق؟.. آتامدان قالان مالی انامین آدینا چئورمیشیک. من آنامدان تنز اؤلسم، نئجه اولاجاق؟ اوشاق لاریما چاتاجاق می؟.. اوتانارام بونو آنامدان سوروشوم؛ دئیر بس اونون اؤلومونو گودورم. بیر وکیل دن سوروشمالییام. یئتیشمه سه؟! نئجه آنا ما دئییم منیم دده مالیمی وصیتینده اوشاق لاریمین آدینا یازسین؟

اؤله یه جم. آخی اؤلوم ائله بو راحتلیقدادی؟! من کی هله آیاقدایام!! منیم ده بوغازیمین یولو، آتام کیمی تیخانسا نه ائیله یه جم؟..

آنمین دریسی نین آلتیندا آنجاق سوموک قالمیشدی. یازیق کیشی سون گون لرده، آنمین بیشیردی بی توپوق سویو دا بوغازیندان آشاغی گئتمیردی. آنام چوخ زحمتله بیشمیش بئچه سویونو آنمین آغزینا تؤکردی. آنجاق آنمین

آغزی، دئشیک تولوق ایدی سانکی. بئچه سویو جویجوسوندن بویون-بوغازینا سوزوردو.

ایسته میرم بیر دری بیر سوموک اولاندا کیمسه منی گؤرسون. عمه مین ده آتام کیمی بوغازی تیخانمیشدی. اؤلمه میشدن اوچ گون قاباق گؤرمه یینه گئتمیشدیم. اووودلاری - اوستونه دری چکیلمیش سوموک ایدی. گؤزلی - قویونون دییندن سیزان ایشق ایدی. گؤزلی - چوخوردان منه باخان بايقوش ایدی سانکی. بوم-بوز بوزارمیشدی. بوتون قانی قولاغیندان آسيلمیش یاقوت سیرغالارا ییغیشمیشدی سانکی. آغ دریسی نین آلتینداکی دامارلار، خریطه اوزرینده کی جیزیلان چای لارا بنزه بیردی.

اینانمیرام. من ائله اولمارام. عمه م یاشلی ایدی. قوجالمیشدی. هله من قیرخ یاشیمی تزه هاخلامامیشام کی!
بلکه ده حکیم کیریخیب. بیر دفعه ده اونون یانینا گئتمه لیم... کیریخماسا نئجه ائيله مه لیم؟..

گؤز لیمی آچیرام. قالخیب یاتاغیمین قیراغیندا اوتورورام. اؤزومه آغلاماغیم گلیر...